

# MU KUWAKA KASI

## NTANGU YAYI MU ME MONA



Beno lenda vwanda. Ya kele mbote na kuvutuka dyaka na nkokila yayi. Beto ke vutula matondo na kuzwa bweso yayi dyaka ntangu yayi samu na kusadila Mfumu. Mpe na manima ya kukanga beno bangunga mingi mazono na nkokila, mu banza ti ya ke vwanda mbote ve na kukanga beno ntangu ya yinda dyaka na nkokila yayi.

<sup>2</sup> Mu vwandaka kaka kuna na manima mu vwandaka kuwa mpangi ya beto ya bakala ya kisalu mosi ya beto, kati na Mfumu, yina me katuka kaka na Indiana, yina vwandaka na kidi-kidi samu na ndosi ya ngitukulu. Yandi me vwandaka ata fioti ve na Shreveport ntete, na luzingu ya yandi. Kasi yandi lotaka ndosi, na nkokila yina, ti yandi kwizaka na Shreveport, na ditoma ya yandi ve. Mpe yandi kwisaka na . . . to yandi kwisaka kisika mosi kuna, na yinzo-Nzambi mosi sika wapi mu vwandaka longa. Yandi tubaka, na manima mu longaka mpe sambilaka samu na bantu, mu tubaka, “Kima mosi ke salama.” Yandi tubaka, yandi “vutukaka kilumbu yina landaka.” Mpe yandi tubaka, yandi “zabaka kivinga yango, mutindu ya vwandaka monana.” Yandi tubaka, “Ya vwandaka—ya vwandaka na salle municipale na lweka yina ya bala-bala, kasi bawu kwendaka ve na kivinga yayi.” Yandi tubaka, “Ya vwandaka na lweka yayi, na kati ya yinzo ya matadi yina vwandaka na dipapu, mpe kivinga yango vwandaka kaka mutindu yayi.” Mpe mwana ya bakala yango kele muntu ke lotaka bandosi, mu me monaka bandosi ya yandi mpe mu zaba ti yawu kele kieleka.

<sup>3</sup> Mpe yandi tubaka—mpe yandi tubaka, “Na yina na nkokila ya nsuka” ti mu “vwandaka zonza mpe vwandaka sambila samu na bambevo.” Mpe mu tubaka, “Kima mosi zola salama.’ Mpe ya wakanaka mutindu makelele ya nzasi.” Mpe yandi tubaka, “Bantu bandaka na kuboka.” Mpe yandi tubaka, “Mutindu nzasi bandaka na kukwenda, mbote,” yandi tubaka “Ndinga mosi basikaka, mpe bandaka na kutuba.” Yandi tubaka, “Ntangu ndinga yina vwandaka tuba, Nkembo ya Nzambi kwisaka mpe kotaka na biyungulu (banela awa na zulu), na mutindu ya Dikunzi ya Tiya.” Yandi me monaka Yawu ata fioti ve. Yandi me kuwaka beto kutubila Yawu, kasi yandi me monaka Yawu ata fioti ve. Mpe yandi tubaka, “Ya vwandaka kuna, Yawu vwandaka kota na banela ya zulu mutindu yayi, mpe salaka Nsemo yayi mutindu beno ke mona na foto, kaka na zulu ya nkonga ya bantu awa.” Mpe yandi tubaka, “Ya vwandaka tuba kima mosi na kunganaka.” Mpe yandi tubaka, mu “telemaka, mpe tubaka,

‘Ya kele Yehowa Nzambi.’”

4 Mpe yandi tubaka ti yandi “bambukaka moyo na (ntangu yandi banzaka na Yawu) ntangu Moise bokilaka . . . basisaka bantu na Egypte. Mpe bawu tubaka, ‘Bika ti Moise kuzonza, mpe Nzambi ve, kana ve beto ke kufwa.’”

5 Yandi tubaka, “Muntu nyonso vwandaka ya kulala na ntoto, maboko ya bawu na zulu, ba vwandaka boka.” Yandi tubaka ti yandi “vwandaka boka, mpe, ‘Mfumu Nzambi, mu zola Nge! Mu zola Nge!’” Mpe kento ya yandi ningisaka yandi mpe vumbulaka yandi.

6 Mu ke mona yandi ke kulumuka na kulwale ntangu yayi, Mpangi Jackson, mulongi ya ntama ya Methodiste. Mpe yandi vwalanganaka mingi, tii yandi kwisaka; mpe tubaka ntangu yandi kotaka, yandi “vwandaka na ngitukulu mingi,” ya vwandaka kieleka mutindu yandi monaka yawu na ndosi. Mu zaba ve yinki ya zola kutuba. Mfumu me bumba yawu na munu. Kasi kima mosi lendaka salama, na kumonaka Mpangi Jackson me lota ndosi mutindu yina, na kuzabaka ti yandi kele muntu ya kusungama, muntu ya kieleka—ya kieleka, kisadi ya Nzambi.

7 Mpe mu—mu zaba ti yandi ke lotaka bandosi, yandi kwisaka na munu, mpe Mfumu pesaka munu ntendulu, ya ke vwanda kaka ya kulunga mutindu yina. Ata mpe, na ntangu mosi, samu na kukwenda ya munu na Arizona, yandi kuzwaka ndosi samu na yawu.

8 Mpe yandi me vwalangana mingi. Yandi kele na kento ya yandi, yandi nataka yandi. Yandi fwana buta ntama mingi ve, mpe mutindu mosi kaka yandi zolaka kwenda vwandaka na mpepo. Yandi vwandaka ve na dikuta samu na kukwisa, mpe muntu mosi pesaka yandi mbongo. Mpe na yawu mambu salamaka na mutindu ya ngitukulu, na yawu kima mosi lendaka salama; beto ke banza mutindu yina. Beto zaba ve kaka yina Mfumu ke pesa na beto.

9 Ntangu yayi, beto ke vutula matondo na Mfumu na kuzinga na kilumbu yayi beto ke na kuzinga, kaka na ntwala ya nkwezulu ya Yesu. Mutindu mu tubaka ntete, ya kele ntangu ya kulutula nene ya disolo nyonso. Mu ke zola mingi kuzinga na ntangu yayi kulutula na ntangu nyonso yankaka, na . . . na zulu ya ntoto.

10 Mu ke mona dyaka awa na ntwala ya beto, na nkokila yayi, nkundi ya munu ya mbote, Mpangi Dauch. Mu zonzilaka yandi na kati ya kivinga na suka yayi. Mpangi Dauch kele na bamvula makumi yivwa na tatu bubu yayi, wapi lusakumunu ya kele. Yandi pesaka luzingu ya yandi ya yinda samu na nkembo mpe lukumu ya Nzambi, yandi ke na bamvula makumi yivwa na tatu bubu yayi. “Mbutukulu ya Kyese” na nge, mpangi ya munu ya bakala! Mpe mu zaba, kuna, bisika nionso na yinsi ya muvimba kisika ba ke na kuwa na nkokila yayi, bawu mpe ke zodila Mpangi Bill Dauch “Mbutukulu ya Kyese.” Yandi kele nkundi

ya ntima ya Oral Roberts, ya bantu mingi, yandi sadisaka bantu mingi na nzila ya Nsangu ya mbote, mpe nyonso. Yandi kele mosi ya bankundi ya beto ya nene.

<sup>11</sup> Mu ke na kiese na kumona Mpangi Mann awa, longi yankaka ya Methodist, yina kuzwaka mpulusu mpe botamaka na Mpeve-Santu, mpe na Nkumbu ya Yesu Klisto, yandi kele ya kuvwanda awa. Yandi kele, mpe, mosi ya bankundi ya beto ya kisalu ya Indiana. Mpe mu me bakula ti Mpangi Hickerson kele ya kuvwanda awa pene-pene ya yandi, mosi ya badiakre ya beto ya Jeffersonville, na Indiana (bawu ke na kuwa kuna na nkokila yayi). Mpe mu me bakula ti Mpangi Wheeler, mosi ya badiakre yankaka kele awa kisika mosi kuna. Mpe mu—mu me mona yandi ntete ve, muntu yina ke lakisa musapi ya yandi kuna mpe mu ke mona yandi na manima ya mwa ntangu fyoti; ya kele ya kuvwanda kuna, kuna na diboko ya kibakala, yinga.

Mpangi Banks Wood, kana nge ke na kuwa na nkokila yayi, mpangi ya nge ya bakala vwandaka awa mazono na nkokila. Mu monaka yandi ntangu mu basikaka, Mpangi Lyle. Mbangi ya Yehowa; kimvuka ya muvimba me ndima. Lyle kotaka samu na manima ya vision ya Mfumu.

<sup>12</sup> Lyle vwandaka kuna na kati ya masuwa kilumbu yina, ntangu kilumbu yina ntete ba tuba na yandi ti “kima mosi” zolaka “kusalama samu na mvumbukulu ya luzingu.” Yandi vwandaka Mbangi ya kieleka ya Yehowa, mpe! Kasi na suka yina, ya vwandaka ya kuvwanda kuna, yandi vwandaka kuloba, mpe yandi kandaka . . . Mbote, yandi vwandaka na mbisi mosi ya nene, ya ntama (yina kele mutindu ya ntama ya Kentucky, beno zaba) . . . ndobo ya nene mpe mwa mbisi mosi ya fioti, minaka yawu. Mpe yandi bendaka kaka mazafu, misopo mpe nionso vwandaka na ngaanda, yandi losaka yawu kuna na masa (mwa ndakala ya mwini), mpe yandi tubaka “Mbote, mwa nkundi ya munu fioti, nge me bula kalati ya nge ya nsuka.” Ya fioti . . . bandaka na kutepa na zulu ya masa, yandi kufwaka, na manima masa pusaka yandi na kati-kati ya lis ya kiziba.

<sup>13</sup> Mpe kilumbu yina tekilaka, kuna, mu tubaka, “Mpeve-Santu ke tuba na munu ti ‘ya ke vwanda na mvumbukulu ya mwa kivangu mosi ya fioti.’ Mu banza ti ya ke vwanda na mwana ya niawu, ntangu mu ke vutuka na yinzo, samu kaka . . .”

<sup>14</sup> Ntangu beto vwanda meka na kutimuna mwa mpambu mosi ya bambisi, Mpangi Wood mpe munu, yina ke na kuwa na nkokila yayi, mwa mwana ya munu ya kento yina kele ntwenya ya kento ya kuvwanda awa, yina kele fiancée na soda yayi ya yinda ya nzutu fyoti. Mutindu bawu . . . Yandi kwisaka, yandi tubaka, “Papa . . .” Yandi na mwana-kento yina yankaka ya ntwenia, tubaka, “Beto . . .” Ntangu yayi, muntu nyonso lenda kuzwa mutindu mosi ya mwa pede yina bawu zola, kasi kieleka mu ke zolaka ve niawu, na yawu yandi . . . to ata Branham. Na

yawu beto. . .yandi tubaka, “Oh, beto monaka niawu mosi ya mawa awa, Papa. Ya kele—ya—ya vwanda kudya kima mosi mpe ya kele. . .muntu ke na kubebisaka yawu, ya kele nyonso ya kuvimba.” Yandi tubaka, “Papa, yawu ke kufwa kaka, beto lenda kuzwa mwa sanduku mpe kubumba yawu bilumbu zole?”

<sup>15</sup> Mu tubaka, “Bika mu mona niawu yango.” Mbote, bawu kwendaka mpe bakaka niawu yango. Mu monaka yina zolaka salama, na mu pesaka yandi sanduku mosi. Mpe na suka yina landaka, vwandaka pene ya ba-niawu sambwadi to nana ya baniawu kuna, beno zaba. Na yina mwana ya munu ya bakala, Joe, bakaka mosi ya yawu, mpe vukisaka yawu mpe losaka yawu na ntoto; mpe na yina—na yina. . .mwa mwana ya niawu ya fioti bandaka na kuniongumuka mutindu pambu mpe yawu kufwaka yandi.

<sup>16</sup> Mpe mu tubaka na Mpangi Lyle, mpangi ya yandi ya bakala, Mu tubaka, “Nge zaba, ya lenda vwanda ti ya ke vwanda mwa mwana yango ya niawu yina vumbukaka na lufwa, mutindu beto monaka Mfumu kusala bima.”

<sup>17</sup> Mpangi Lyle, kaka ya malu-malu na nzila. Mpeve-Santu tubaka kaka na yandi ti yandi kukwelanaka, mpe yina yandi salaka, mpe bayimbi yina yandi salaka, bima yina yandi salaka. Mbote, yandi banzaka ti Mpangi Banks vwandaka tuba na munu bima yina. Kasi ntangu Yawu basisaka yandi kieleka, mpe tubaka na yandi yina yandi salaka na kilumbu yina tekilaka na nkokila, yina vwandaka—yina vwandaka mpasi mingi samu na yandi. Yandi lendaka ve kuzwa yawu.

<sup>18</sup> Na yina, na suka yina landaka. . .Na yina beto lobaka mpimpa ya muvimba, na mwa mbisi, beto vwandaka kanga mwa mpambu. Kasi yandi losaka dyaka mwa mbisi yina na kati ya masa, yandi ninganaka na makelele, mpe lembaka. Pene ya kati-kati ya ngunga na ntwala beto vwandaka ya kuvwanda kuna, mpe mu vwandaka. . .Mu tubaka, “Mpangi Lyle, nge me bika bambisi kumina ndobo nionso kuna na kifundu ya yandi. Nge me mona?” Mu tubaka, “Baka nsinga ya ndobo awa, kanga yawu, mutambu ya mutindu yina; kaka na ntangu yandi ke simba yawu,” Mu tubaka “na yina beno kanga yandi kaka mpe na manima beno nata yandi na kati.” Mu tubaka, “Yandi. . .beno basisa yandi ve mutindu yina, beno mina yawu ve, beno ke kuzwa mbisi.”

<sup>19</sup> Yandi tubaka, “Mbote. . .” Yandi vwandaka na nsinga mosi ya nene, ya ntama na zulu, yandi tubaka, “Yayi kele mutindu beto ke salaka yawu,” mutindu yina.

<sup>20</sup> Na yawu, kaka pene ya ntangu yina, mu kuwaka Kima mosi katukaka na zulu ya mongo kuna, kitembo, vwandaka baluka mpe kubaluka. Tala Yawu kulumukaka mutindu yayi, mpe Mpeve ya Nzambi kulumukaka na zulu ya bwatu, tubaka,

“Telama.” Yandi tubaka, “Tuba na mbisi yina ya kufwa. Beno tuba, ‘Mu ke vutula nge luzingu ya nge.’”

<sup>21</sup> Mpe mwa mbisi yina ya fioti vwandaka ya kulala kuna kati-kati ya ngunga mosi, na misopo ya yandi na kati ya yinwa ya yandi, mpe mazafu ya yandi. Mu tubaka, “Mwa mbisi ya fioti, Yesu Klisto me pesa nge luzingu ya nge. Zinga, na Nkumbu ya Yesu Klisto.” Na mbala mosi yandi vutukaka, mpe yandi kotaka na masa na mbangu nionso.

<sup>22</sup> Mpangi Lyle, nge kele awa kisika mosi kuna? Mu—mu monaka nge mazono na nkokila. Kana yandi kele na kati, na ngaanda, to kisika yandi kele, beno telemisa diboko ya beno kana mu lenda mona beno. [Muntu mosi me tuba, “Balcon.”—Mu.] Yinki beno ke tuba? Na balak- . . . Oh, yinga, kuna na balcon, na bana na manima kuna. Ya kele bakala yango, Mbangi ya Yehowa.

<sup>23</sup> Yandi tubaka, “Mpangi Branham!” Yandi vwandaka na nyonso ya kuzatuka, yandi tubaka, “Uh, ya kele—ya kele mbote na kuvwanda awa. Mutindu yina ve?” Yandi tubaka, “Uh-uh, nge—nge. . . Uh, nge banza ti ya vwandaka munu, ti—ti—ti, mu bokilaka mwa mbisi yina ya fioti, yandi tubaka, ‘Ya vwandaka ntangu ya nsuka samu na nge?’” Yandi tubaka, “Yina—yina—yina zola tuba kima mosi samu na munu?”

<sup>24</sup> Mu tubaka, “Ve, ve, kaka nsiamisa.” Yandi vwandaka nyonso ya kunyonga samu na yawu.

<sup>25</sup> Mbote, ntangu nyonso beto ke na kuzieta mpe beno ke mona bima yina kusalama, na kuzabaka. . . Ntangu yayi, beno banza kaka, yinki ya vwandaka kulakisa? Mu vwandaka na bana ya fioti bikata ya ngolo na liste ya munu ya bisambu, bayina mu vwandaka sambila, kasi ntangu vision kwisaka ya vwandaka samu na mwa mbisi mosi ya ntama pene-pene ya ba-centimetre makumi sambwadi na sambanu to tatu. Ya talanaka ti ndobo vwandaka nene kulutula mbisi. Kasi yina ya vwandaka, vwandaka kulakisa beno ti Nzambi ke talaka na zulu ya mwa bima ya fyoti mpe. Beno me mona?

<sup>26</sup> Kilumbu mosi ntangu bantu ya kimbevo ya wazi vwandaka ya kulala bisika nionso na yinsi, Yandi sadilaka ngolo ya Yandi mpe singaka yinti. Yawu bandaka na kuyuma, na yina ya vwandaka na bantu ya kulala bisika nionso yina vwandaka na nsatu ya ngolo yina ya kubeluka ya nzutu. Kasi, beno me mona, Yandi zolaka kulakisa ti Yandi kele Nzambi na zulu ya nyonso, kana ya kele fyoti, kana ya kele nene, nyonso yina ya kele. Yandi kele kaka Nzambi na zulu ya bima nyonso, ngidikulu nyonso. Na yawu beto zola Yandi samu. . . Yina—yina ke pesa beto kuzaba, kana Yandi ke sepela na kukotisa na nzila ya Ndinga luzingu na mwa mbisi ya kukondwa mfunu ya kulala kuna ya kufwa, kubanda kati-kati ya ngunga na zulu ya masa, Yandi lenda kieleka kilumbu mosi kukotisa Luzingu na kati ya bana ya

Yandi. Ata ti kana nzutu ya beno kele kaka lutu ya putulu, Yandi ke zonza, mpe beto ke pesa Yandi mvutu kilumbu mosi. Yandi kele Nzambi Yina ke landilaka na bima nyonso, nyonso yina beto ke salaka, nyonso yina beto ke tubaka, nyonso. Yandi ke landilaka yawu.

Ntangu yayi beto kulumusa bayintu ya beto, bisika nionso.

<sup>27</sup> Mu ke kukiyufula ntangu yayi, ntete beto sambila, kana ya kele na muntu na nkokila yayi yina ke sepela na Yandi, kasi yina kele ve ntete na kisika ya kuyidika samu na Yinsi yina beto ke na kwenda samu na kumona Yandi. Beno zaba, beno lenda ve kukota kukondwa kisika yina ba me yidika. Mpe beno me sala yawu ntete ve, kasi beno ke zola ti ba bambuka beno moyo na kisambu ntangu yayi, ti bima nionso ke salama kaka kati-kati ya beno na Nzambi na nkokila yayi, beno zola telemisa kaka diboko ya beno; beno ke tuba, “Bambuka moyo na munu, Mfumu”? Nge kele. . . bika kaka Yandi kumona diboko ya nge. Nzambi, pesa yawu.

<sup>28</sup> Tata ya Mazulu, na yina beto ke telama na nkokila yayi na kati-kati ya luzingu mpe bantu ya kufwa; mpe bima yayi yina ke na kusalama na bilumbu yayi, ya mansweki, ya kieleka ya kele ya mansweki; kasi Nzambi, Nge zaba kana ya kele kieleka to ve, Nge kele Zuzi ya kieleka ya mazulu mpe ntoto. Mpe beto ke tuba yayi, Mfumu, kaka samu na kupesa ngolo na bantu (ndambu ya bima yina Nge me lakisa beto), ti ba ke pesa ngolo na kuzola Nge mpe kukwikila Nge, kusadila Nge, mpe kuzaba ti ya lenda vwanda yinki mutindu mwa mambu kele, ya mbote to ya yimbi, Beno me mona yawu. Mu ke sambila, Nzambi ya luzolo, ti Nge sakumuna maboko nyonso yina na nkokila yayi, mpe moyo mpe mpeve yina ke tindika diboko yina na kutelama. Mpe mu ke sambila, Nzambi, ti yayi ke vwanda nkokila ti bisika ya bawu yina ba me yidikaka ke salama samu na Yinsi yina kuna na simu ya nzadi. Pesa yawu.

<sup>29</sup> Belusa bambevo mpe bantu ya mpasi, Mfumu, bayayi kele awa, mpe yina kele bisika nyonso na yinsi kisika ba ke samuna nsamunu yayi na nzila ya allo-allo. Sakumuna bayina kele kuna bayina me kuzwa mpulusu ve, katuka na Californie tii na New York, katuka na Canada tii na Mexique. Pesa, Mfumu, ti konso muntu na yisi ya muningu ya ndinga ya beto, na nkokila yayi, ke kuzwa mpulusu na masumu ya bawu, ke beluka na kimbevo ya bawu, samu na Mvwandulu ya Nge ya Kinzambi.

<sup>30</sup> Mpe yayi Mpangi ya beto ya bakala Jackson, yina me sala nzyetolo na pepo bisika nyonso na yisi ya bakilometele yayi awa, samu na kuvwanda awa samu ti kima mosi ke sepelisa ntima ya yandi; “Mpe bawu ke lota bandosi, mpe ke mona ba-vision.” Nzambi ya luzolo, Nge me bumba yawu kinsweki na munu, yina yayi zola kutuba; mu zaba ve. Kasi kana Nge kwisa kutala beto, Mfumu, yidika bantima ya beto ntangu yayi samu na kutala yayi.

Ti beto fwana vwanda na yisi ya kuvingila, na kuzabaka ve yina Nge ke sala, mpe na kuzabaka ve kana Nge silaka na kwiza tala beto na nzila ya ndosi yayi; beto zaba ve. Kasi beto ke—ke na kutangaka kaka bima yina beto ke na kubakula, ti Nge silaka na kutala bantu ya Nge, mpe beto ke sambila ti Nge ke kukumisa Nge mosi kieleka na beto awa. Na Nkumbu ya Yesu Klisto beto me lomba yawu. Amen.

<sup>31</sup> Ntangu yayi, na nkokila yayi, na manima ya kukanga beno bangunga mingi mazono na nkokila mpe na suka yayi, mpe ndinga ya munu me kangama fioti. Mu kele na mwa kitini ya postiche yina kele na munu, mu ke lwata na zulu ya dibasi ya munu *awa* ntangu mu ke longa. Kasi mu me zimbana yawu ntangu yayi, mpe na mupepe yayi, ke na kubula na banela yayi, ndinga ya munu me kangama mwa fioti. Mu vwandaka . . . Mu zolaka kanga balukutakanu mingi, kasi kubanda ntangu mu me kuzwa yawu, na yina ya ke yangisa munu diaka ve, mu ke kwenda kaka na ntwala. Mpe mu me zimbana yawu, mpe ya kele . . . Mu me . . . mutindu ya lenda kuwa yawu, na yawu bisambu ya beno ke sepela mingi. Mpe ntangu yayi, bayayi kele balukutakanu zole konso kilumbu, ti bawu kele . . . mutindu ya kuzwa . . . Beno zaba, ntangu beno kele na bakilometele mingi, ya . . . beno lenda tuba yawu.

<sup>32</sup> Na yawu ntangu yayi samu na beno bantu ya Californie, mpe kuna na Arizona, beto nyonso ke fidisa mbote bisika nyonso na yinsi. Mpangi Leo mpe kimvuka yina ke na kuvingila na Mfumu kuna na Prescott, yina ba me bokila ntangu yayi, mpe beno nionso bantu yina ke pene-pene ya Phoenix, sabala mosi me katuka na nkokila yayi, beto ke vwanda kuna na Yuma na feti. Ba me teka dezia batiké kuna mpe ba me luwe kivinga ya nene, mpe bawu kele ve na bisika mingi samu na bantu nionso. Na yawu beno kwiza na ntangu ya mbote, beno nyonso, samu na—na kukota. Na manima beto ke kwenda na Los Angeles kuna, na Kilumbu ya ntete yina ke landa . . . Lumingu ke kwiza, na nkokila ya Lumingu. Mpe na yawu beto ke na kuvingila na kumona beno bisika nyonso kuna. Balusakumunu ya bimvwama ya Nzambi kuvwanda na zulu ya beno nyonso.

<sup>33</sup> Samu na beno na New York, mpe beno bayina kele pene-pene ya Ohio mpe bisika yankaka, ntama mingi ve mu zola kulonga Nsangu ya *Nzila Ya Nyoka* (kibulu na mbandukulu, mpe kibulu na nsuka), na tabernacle. Billy ke tinda nge note samu na yawu, ntangu beto ke tuba yawu, samu ti mu ke salaka yawu na Tabernacle samu ti ya ke vwanda, na kutala, bangunga yiya to kulutila.

<sup>34</sup> Na yawu ntangu yayi . . . na yawu mu zola beno awa, awa mpe kisika nyonso beno kele ntangu yayi, samu na kubaka Buku ya Job. Kieleka Buku ya ngitukulu samu na kulonga, kasi mu zola kaka kusadila mwa banoti awa ntangu yayi.

<sup>35</sup> Mpe na yina, mbasi na suka, awa na tabernacle, ya ke vwanda na balukutakanu ya Lukolo ya Lumingu na . . . Beto ke banda awa na wapi ntangu? [Mpangi-bakala mosi me tuba, “Na ngunga ya yivwa na ndambu.”—Mu.] Na ngunga ya yivwa na ndambu. Mpe na yina mu ke na bweso ya kutuba diaka mbasi. Mpe kana Mfumu zola, mu zolaka kuzonza na zulu ya dyambu . . . kana Yandi zola, ntangu yayi, na yina mu vwandaka tanga na manima ya midi yayi, samu na kulakisa beno ti, “Ya kele kaka na kisika mosi yina Nzambi ke kutana na musambidi.” Uh-huh, kaka . . . Mpe—mpe lenda tuba na beno yinki kisika yina kele, mpe yinki Nkumbu ya kisika yina kele, kisika Nzambi ke kutana na musambidi.

<sup>36</sup> Mpe na yina, mbasi na nkokila, mu ke lomba lemvo, ya kele, samu na lukutakanu ya kubeluka ya nzutu. Mpe mu—mu ke zola lukutakanu ya kubeluka ya mutindu ya ntama. Mpe kana Mfumu zola, mu zola kuzonza na zulu ya dyambu yina me yangisa munu bubu yayi . . . Ntangu Mpangi Moore mpe munu vwandaka solula kintwadi, bampangi ya munu ya ntalu, beto vwandaka zonzila Masonuku. Mpe wapi mutindu ya zolaka vwanda na bampangi yango ya babakala, mutindu bantangu ya ntama. Mpe yandi tubaka, “Nge zaba, Mpangi Branham, kulonga nyonso yina nge me salaka ntete samu na beto awa na Shreveport, *Mwana-dimeme Mpe Yembe* vwandaka mosi ya bansangu ya kulutula kitoko yina nge me natinaka beto ntete awa na Shreveport.” Yandi tubaka, “Mu banza ti Nsangu ya nge kele nene mingi samu na nge bubu yayi, nge lenda kukuma ata fioti ve na nsangu ya mutindu yina.”

<sup>37</sup> “Ntangu mu ke kondwa Yawu, mu ke kondwa Nsangu ya munu.” Zola kele ya munu . . .

Mwana-dimeme ya luzolo yina ke na kufwa,  
Menga ya Nge ya ntalu  
Yandi ke zimbisa ngolo ya yandi ata fioti ve,  
Tii na kilumbu yina Dibuundu ya Nzambi yina  
me sumbama  
Beni kuzwa mpulusu, samu na kusumuka  
dyaka ve.

Kubanda na lukwikilu mu monaka yinto yina  
Yina bamputa ya nge ke na kubasisaka,  
Zola ya mpulusu me vwanda diambu ya munu,  
Mpe ya ke vwanda tii mu ke kufwa.

<sup>38</sup> Mbasi na nkokila, kana ya kele luzolo ya Mfumu, mu zola kulonga dilongi: *Na Zulu Ya Mapapu Ya Yembe Ya Mpembe Mutindu Mvula-mpembe*. Mbasi na nkokila, “Mfumu ke kulumuka na zulu ya mapapu ya Yembe,” ya kele, kana Mfumu zola, ndinga ya munu ke kuma yimbi mingi ve. Ntangu yayi . . . na yawu, sambila samu na beto.



<sup>39</sup> Mpe kuna mu zola lukutakanu ya bisambu ya mutindu ya ntama mutindu beto kuzwaka na mbandukulu, ve kuswasikisa mabanza, beno pesa kaka konso kalati yina zola ti ba sambila samu na yawu. Ntangu yayi, beno fwana kuzwa kalati, na yawu beno vwanda awa na ntangu ya mbote samu ti Billy lenda pesa beno kalati mpe kusungika yawu. Kana beno sala yawu ve, bantu ke landila kaka na kuluta, kuluta, mpe kuluta, mpe ya ke vwanda ve na nsuka na mulonga. Muntu nyonso lenda kuzwa kalati. Mu zola Mpangi Jack kutelama pene-pene ya munu na ndonga ya bisambu, mutindu beno vwandaka sala, mpe Mpangi Brown na kunataka bantu na munu na kisika ya Billy Paul. Mu—mu—mu—mu ke zola—mu ke zola ndonga ya bisambu ya mutindu ya ntama, mpe beto ke sambila kaka mutindu beto vwandaka sala na bamvula me luta.

<sup>40</sup> Mu ke na kiese na nkokila yayi na kuvwanda na mpangi-bakala yankaka yina ke salaka kintwadi na beto, yandi talaka kaka bisika nyonso mpe ndimaka na manima mpe monaka yandi, baminuti fyoti me luta, Mpangi Gordon Lindsay. Yandi kele mosi ya bantu ya ntama, yina vwandaka na beto kubanda ntama. Na kusalaka kisalu ya nene, yandi ke na kubasisa buku na masini, yandi ke na kubasisaka na masini buku ya munu ntangu yayi: *Bansungi Sambwadi ya Dibuundu*. Beto ke na kivuvu ti beto me kukubika yawu diaka, *Bidimbu Sambwadi*. Kana yandi tanga yawu ntete yandi basisa yawu na buku, beto ke kuzwa balukanu ya théologie. Mu lenda kaka kuwa yawu kukwiza. Kasi yandi zaba ti mu kele théologien ve. Na yawu . . . Mbote, beto ke na kuingila na kivuvu mbasi na nkokila. Kana nge kele awa, Mpangi Lindsay, vwanda awa mbasi na nkokila. Kana nge kele, kwiza vukana mpe na beto na estrade samu na lukutakanu ya bisambu ya ntangu ya ntama.

<sup>41</sup> Bantu yikwa ke zola kumona mosi ya ndonga ya biswambu ya ntangu ya ntama dyaka, kisika beto ke nata bantu? Ya ke vwanda mbote. Ntangu yayi, beno nata bambevo mpe bantu ya mpasi, mbasi na nkokila, samu na lukanu yina.

<sup>42</sup> Ntangu yayi, kana beno kele na Buku ya Job, nzila ya 42 . . . to kapu 42, mpe banzila sambanu ya ntete ya kapu ya 42 ya Job; ya kele kieleka ngitukulu. Mpangi Ted Riley, kana nge ke na kuwa na nkokila yayi, kuna na Phoenix, nge ke bambuka moyo nge mpe munu vwandaka tuba kilumbu mosi, pene ya sabala mosi to zole me luta, mpe beto vwandaka tubila yayi? Mu tubaka na nge, “Kilumbu yina ke kuma dilongi samu na munu.” Mpe mu zola sadila yawu na nkokila yayi.

*Na manima vutulaka mvutu . . .*

*Na yina Job pesaka mvutu na MFUMU, mpe tubaka,*

Beno kuwa mbote kutanga yayi ntangu yayi.

*Mu zaba ti nge lenda sala mambu nyonso, mpe ti ata ntembe mosi ve lenda vwanda na nge.*

*Nani yandi yayi ke bumba malongi kukondwa luzabu?  
na yina mu me samuna mambu yina mu me bakula ve;  
bima kele mbote mingi samu na munu, yina mu me zaba  
ve.*

*Kuwa, lemvo ya nge, mpe mu ke zonza: Mu ke lomb  
nge, mpe nge ke tuba na munu.*

*Dikutu ya munu me kuwaka nge: kasi ntangu yayi disu  
ya munu me mona nge.*

*Yawu yina mu ke na boma ya munu mosi, mpe mu ke  
balula ntima na putulu mpe mbombi.*

43 Ntangu yayi mu zola baka dilongi na nzila yina ya 5.

*Dikutu ya munu me kuwaka nge: kasi ntangu yayi disu  
ya munu me mona nge.*

Bika ti Mfumu kusakumuna Ndinga ya Yandi.

44 Job, beto baka mwa luzingu ya yandi. Job vwandaka profete. Yandi vwandaka muntu yina zingaka kuna na ntuala Biblia kusunama. Ba banzaka ti Job vwandaka mosi ya Babuku ya kulutula ntama ya Biblia, samu ti Yawu kusunamaka ntete Genèse kusunama. Job, munwani-mvita ya nene yayi mpe profete yayi, vwandaka muntu ya ngolo mingi na kilumbu ya yandi. Kukondwa ntembe ti ba nataka yandi mpe sadilaka Mfumu luzingu ya yandi nyonso. Mpe zingaka luzingu mosi ya kikesa na bantu, bawu nionso vwandaka na luzitu samu na yandi.

45 Kasi yandi zolaka kuma na kisika yina yandi ke bokilaka yawu awa, na kuvwandaka ya *kumekama* na Mfumu. Kasi mu ke zola kusadila ndinga, na kuvwandaka “ya kumekama” na Mfumu. Mpe ya kieleka, “Konso mwana yina ke kwizaka na Nzambi fwana vwanda ya kumekama ntete, ya kuteza, ya kulongoka.” Mpe na yina kana kumekama ke kuma ngolo, mpe beto ke banza ti ya kele mpasi mingi mpe ke kuwa ve (beno sala keba), na yina Yandi tubaka ti beto “me kuma mwana ya makangu, mpe mwana ya Nzambi ve.” Samu ti, ya kele ve na kima yina lenda katula mwana ya Nzambi ya kieleka, yina me butuka mbala zole na Bibuti ya yandi, beno me mona, yandi kele kitini ya Yandi. Beno lenda dyaka ve kumanga yawu, beno lenda manga beno mosi. Beno me mona, beno me kuzwa kimbangi, ba me longusa beno mpe me teza.

46 Mpe ntangu yayi, bakala yayi vwandaka profete, yandi vwandaka na muswa ya lemvo ya Nzambi, kasi Job vwandaka ve na Biblia samu na kutanga. Yandi . . . Biblia sonamaka ve na ntangu yina, kasi yandi vwandaka na muswa ya Nzambi na nzila ya luzayikisu mpe na nzila ya vision. Yina vwandaka ntete Biblia kusunama.

47 Ntangu yayi, beto ke mona ti, mpe kubaka ndambu ya luzingu ya yandi, ntangu Nzambi sakumunaka yandi mpe salaka

yandi muntu ya nene. Na yina, ata mpe muntu nyonso zitisaka yandi, ata mpe na ndwenga ya yandi, kumaka nene mingi. Lutwadusu ya yandi ya kimpeve ya Nzambi siamisaka ti yandi vwandaka kisadi ya Nzambi, pwelele mingi, tii ntangu bantu ke katuka bisika nyonso na kuwa yandi. Mpe kuna Satana bandaka na kufunda muntu yina. Mpe ya kele mutindu yandi ke salaka kisadi nyonso ya kutwadisa na kimpeve ya Nzambi, Satana kele ntangu nyonso kuna samu na kufunda yandi na nyonso yina yandi ke salaka ti ya kele kieleka ve.

<sup>48</sup> Mpe, ntangu yayi, beto ke mona ti luzingu ya yandi mpe bakumekama ya yandi, mpe lukwikilu ya yandi ya nene. Mpe Yesu, ntangu Yandi kwizaka na zulu ya ntoto, Yandi vutukilaka na mvibudulu ya Job. Yandi tubaka, “Benoni me tangaka ve mvibudulu ya Job?” Lukwikilu ke vingila na mvibudulu samu na Ndinga ya nsilulu kulungisama.

<sup>49</sup> Ntangu yayi, beto ke tala awa ti Job, na manima yandi lutaka na bakumekama ya yandi, bampasi ya yandi nyonso. . . Yandi vwandaka na dibuta mosi ya kitoko, ba katulaka yandi na yandi. Yandi vwandaka na mavimpi ya mbote, ba katulaka yawu na yandi. Nyonso yina yandi kuzwaka na luzingu yayi ba katulaka yandi yawu. Mpe yandi vwandaka na zulu ya mbombi, na kitini ya kimenga, na bamputa ya yandi. Mpe ata mpe kento ya yandi mosi, zonzaka na kuteleminaka yandi, yandi tubaka, “Samu na yinki ve kusinga Nzambi, mpe kufwa?”

<sup>50</sup> Yandi tubaka, “Nge ke zonga mutindu kento ya kilawu.” Yandi tubaka, “Mfumu me pesa, mpe Mfumu me baka, nkembo na Nkumbu ya Mfumu!”

<sup>51</sup> Ntangu yayi, Satana kwisaka na ntwala ya Nzambi, samu yandi lendaka kwisa na ntwala ya Nzambi, mpe fundaka Baklisto (to, bakwikidi) ntangu nyonso. Na yawu yandi fundaka Job ya bima mingi, mpe tubaka ti “Job, ya kele samu na yina yandi lendaka sadila Nzambi, samu bima nyonso vwandaka tambula mbote samu na yandi.” Kasi yandi tubaka, “Kana Nge ke bika kaka munu kuzwa yandi, na maboko ya munu, mu ke sala ti yandi kusinga Nge na kizizi ya Nge.”

<sup>52</sup> Mu zola beno kutala ti kivuvu yina Nzambi kuzwaka na kati ya mukwikidi. Benoni me mona? Yandi kele. . . Na nzonzolo yankaka, Nzambi tubaka na Job. . . to tubaka na Satana, mutindu yayi, “Benoni lenda ve kusala yawu! Yandi kele muntu yina ba me nungisa. Yandi kele muntu ya mbote. Yandi. . . ya kele ve na mosi mutindu yandi na ntoto ya muvimba.” O wapi muntu; ti Nzambi Yandi mosi zolaka tuba na mbeni ya Yandi, “Kisadi ya munu kele mingi ya kulunga, ya kele ve na muntu yankaka na zulu ya ntoto mutindu yandi.” Oh! Kana beto lendaka kaka kuvwanda mutindu ya muntu yina! Ti Nzambi lendaka na kupesa beto kivuvu mingi! Yina zaba ti beto ke katuka ve na Ndinga ya Yandi to na Mvwandulu ya Yandi, na

mutindu nyonso! Beno vwanda kieleka, mpe Yandi lenda tula kivuvu ya Yandi na kati ya beto.

<sup>53</sup> Ntangu yayi, Job vwandaka muntu yina vwandaka sadila misiku ya Nzambi landila konso kisono, ya kieleka. Mpe Satana zabaka yawu, kasi yandi tubaka, “Kana Nge ke bika kaka munu kuzwa yandi, mu ke sala ti yandi kusinga Nge na kizizi ya Nge.”

<sup>54</sup> Na yawu Nzambi tubaka na yandi, Yandi tubaka, “Ntangu yayi, yandi kele na maboko ya nge, kasi kubaka ve luzingu ya yandi.” Mpe Satana kwendaka ntama mutindu yandi lendaka kwenda. Yandi bakaka konso nkundi, mpe nionso yina yandi vwandaka na yawu, na luzingu ya yandi ya muvimba, kasi yandi lendaka ve kubaka luzingu ya yandi. Kasi Job simbaka kaka ngolo mingi, ya vwandaka ve na mutindu ya kuvutuka na manima.

<sup>55</sup> Beno me mona, ntangu muntu to muntu mosi me kutanaka kieleka mbala mosi na Nzambi, na lukwikilu ya kieleka yina, yina me monisama pwelele ti “Nzambi kele!” Ya kele na kima ve, ata ntangu ve, kisika mosi ve, yina lenda kabula muntu yina na Nzambi ya yandi. Mu banza ti ya vwandaka Paul tubaka, “Ya kele ve na kunwana, ata nsatu, ata bampasi ve, ata bivangu ya moyo, to lufwa, to kima mosi yina lenda kabula beto na zola ya Nzambi yina kele na kati ya Klisto Yesu.” Beno kele kieleka ya kukangama na Yandi samu ti ba tumaka beno na Luzingu yina.

<sup>56</sup> Kasi Satana banzaka ti yandi lendaka kuzwa yandi mwa fioti, mpe kupesa yandi mbata, mpe kusala ti yandi kusala yawu. Kasi, beno me mona, Job na luzayikisu ya yandi ya kulunga ya Nzambi, mpe Nani Nzambi vwandaka, mpe mutindu Nzambi zolaka yandi, yandi vingilaka! Ata ti mambu yina vwandaka, yandi vingilaka lukwikilu ya yandi kusiamisama, samu ti yandi vwandaka me simba Nzambi, luzayikisu. Ti mu me zonzila mazono na nkokila.

<sup>57</sup> Ntangu yayi, ntangu bambevo yina kele na kati ya yinzo yayi, bikata, to nge yina kele na nsatu ya Nzambi, ntangu beno lenda kuzwa mutindu yina ya luzayikisu ti beno kele “ya kunungisama,” ntangu beno kele kieleka na muswa ya kulomba kima yina beno ke na kulombaka, mpe ke kwikila ti “Yandi kele Musendo ya bayina kieleka ke sosaka Yandi,” ya kele ve na kima yina lenda kabula beno na lukwikilu yina kele ya kukangama na beno. Beno me mona? Kasi, ntete, ya fwana monisama na beno.

<sup>58</sup> Muntu mosi kwizaka ntama mingi ve, kimvuka ya bantu, bayankaka ya bawu yina vwandaka kuwa na nkokila yayi, mpe tubaka na munu, yandi tubaka. . . Mu landilaka na kutuba na bawu, “Kwenda na Kentucky, mafuta kele kuna.” Mu zabaka ti ya vwandaka, mu monaka yawu na vision.

<sup>59</sup> Mbote, Mpangi Demos mpe bayankaka kwendaka ntama mingi ve. Na manima ya mwa ntangu, na nsuka, bawu tubaka. . .

Na manima ya Texas me kota. Mpe bawu tubaka, “Ntangu yayi beto ke kwenda kuna.”

<sup>60</sup> Mu tubaka, “Nge zolaka kwenda ntama mingi ve.” Kasi bawu salaka yawu ve.

<sup>61</sup> Demos tubaka, “Mu salaka foti ya nene na kati ya yawu, na kusalaka yawu ve, Mpangi Branham.”

<sup>62</sup> Mu tubaka, “Kana nge kwendaka kuna, nge zolaka kuzwa yawu nyonso.”

<sup>63</sup> Mbote, bawu zolaka ve kuwa yawu. Na yina ya ntete. . . kuna ntete beto bika nkokila yango. . . Kisika beto vwanda kuzwa madya. Mpeve-Santu lakisaka munu kupasuka ya nene na ntoto, mpe na yina vwandaka ya kufuluka na mafuta, mpe na kufuluka yayi kisika ya vwandaka pompa na Kentucky yina vwandaka kaka mwa bambeto ya fioti ya petolodi, kasi yayi me katuka na mwa masa ya nene. Mpe mu tubaka, “Mpangi Demos, ya kele kuna.”

<sup>64</sup> Na yawu bawu kwendaka na kusosa yawu. Yandi tubaka, “Kwenda kuna mpe tuba na beto kisika—kisika petolodi kele mbote.”

<sup>65</sup> Mu tubaka, “Oh, ve! Ve! Ve!”

<sup>66</sup> Beno me mona, beto ke sadilaka ve dikabu ya Nzambi samu na mumbongo. Ve! Ve! Yandi lendaka tuba na munu kisika ya vwandaka, kasi mu ke na nsatu ya yawu ve. Mu ke vwanda na lukwikilu mingi ve samu na kuyufula Yandi. Beno me mona? Kana mu vwandaka na nsatu ya yawu, mu banza ti kana mu ke lomba Yandi, mu ke tuba na munu. Kasi ntete, beno me mona, bamitifi ya beno mpe balukanu ya beno fwana vwanda ya kusungama. Beno fwana kuzwa bikuma samu na yayi. Nzambi ke pesaka beno ve bima yina kaka samu ti beno me lomba. Mpe beno lenda ve kulomba na lukwikilu kana ya kele na lukanu ya kieleka samu na yawu, samu na kuvwanda na luzolo ya Nzambi. Beno me mona, kana beno zola kuvwanda mbote, samu na yinki beno zola kuvwanda mbote? Beno me mona, kana beno zola kubeluka, yinki kele samu na yina beno zola kubeluka? Yinki beno ke na kutuba na Nzambi? Yinki beno zola kusala na luzingu ya beno ntangu beno ke beluka? Beno me mona, ya fwana vwanda. . . beno fwana vwanda na mitifi mpe lukanu, mpe bawu fwana vwanda kaka landila luzolo ya Nzambi. Mpe na yina ntangu lukwikilu me monisama na beno, mpe Nzambi na nzila ya bunene ya Yandi ya ngolo nyonso yina lukwikilu na kati kuna, kuna ya me suka. Beno me mona? Ntangu yayi beno me mona?

<sup>67</sup> Ntangu yayi, samu na kukumisa Ndinga yina kieleka, ntangu bampangi kulumukaka kuna, bawu kuzwaka. . . muntu mosi kwendaka kuna mpe sumbaka kinkuku ya bima, mpe tekaka yawu, mpe zengaka mosi na yankaka mutindu yayi. Mu tubaka, “Nge me mona, ya ke simba ve.” Ntangu yayi kaka samu

na kupesa *profesi* kieleka, na kati ya ba-mètre nkama mosi na kisika babakala yayi vwandaka timuna dibulu ya bawu, bakala yankaka kuzwaka dibulu yankaka yina vwandaka basisa petolodi. Mpe ya kele kuna, kumi na mosi ya ba-barril ya mafuta na ndambu ya kilumbu, to kima mosi to yankaka ya mutindu yina; mpe ya ke landila na kubasika, mbala mosi na yinto yayi ya ngudi. Kasi kaka samu na kupesa *profesi*, Ndinga yina ba tubaka ti ya vwandaka kuna, ya vwandaka kuna. Bayankaka na kati ya bawu nionso vwandaka ya kuyuma, bisika nionso na Kentucky. Ya kele mwa biziba ya fioti, yina ba ke pompaka na mwa ntangu fioti, mpe na manima ba ke kwenda. Yina yankaka kele ya kufuluka na *yayi*. Beno me mona?

<sup>68</sup> Kasi, samu ti munimi kotaka na kati ya yawu, balukanu vwandaka yimbi, samu na kutula kidimbu ya bima “ya ke vwanza mutindu *yayi*,” ntangu bawu silaka ti bawu ke sala yawu samu na Kimfumu ya Nzambi, kasi beno tala mutindu ya kele samu na bawu mosi. Beno me mona?

<sup>69</sup> Mpe ya ke simba ve, ata kima mosi ve ya munimi ke sala. Bamitifi ya beno mpe balukanu ya beno fwana vwanza kieleka, ya kulunga, na yina beno ke kuzwa lukwikilu, samu na kulumba. “Kana bantima ya beto ke na kufundisa beto ve, na yina beto ke tula kivuvu.” Beno me mona? Beno me mona, beto fwana tula kivuvu. “Mu zola ti yayi kuvwanda samu na lukumu mpe nkembo ya Nzambi.” Na yina lukwikilu kele na nzila yina ke kota; kana ya kele ve mutindu yina, na yina beno kele na lukwikilu ya yintu, ya mayela, mpe ya kele ve lukwikilu ya kieleka na Nzambi. Lukwikilu yango ya mayela ke kuzwa beno kisika mosi ve. Beno lenda kuzwa emotion, kasi ya ke kuzwa beno ve kubeluka yina beno ke na kusosa.

<sup>70</sup> Na yawu, Job, vwandaka kukitala yandi mosi na lukwikilu ya kieleka yina Nzambi pesaka na yandi ti yandi vwandaka “kaka,” ti yandi salaka nyonso yina Nzambi lombaka yandi na kusala. Ntangu yayi ntangu ba ke sambila beto, samu na kimbevo ya beto, mu ke kukiyufula kana beto me sala nionso yina Nzambi me lomba beto na kusala. Beto me landa konso kitini ya Masonuku? Beto me pesa Yandi bantima ya beto mpe baluzingu ya beto samu na kusalu? Yinki kele kikuma beno zola kubeluka? Ya kele samu na yina beno lenda ve kuzwa lukwikilu ya kulutila, beno me mona, samu ti beno kele ve na ntangu yankaka me sala kima yayi na Nzambi kieleka na ntima ya beno. Mutindu Ézéchias salaka, pesaka Nzambi kikuma, yandi zolaka kutula kimfumu ya yandi—ya yandi na ndonga. Mpe Nzambi fidisaka profete ya Yandi na manima mpe tubaka na yandi, mpe yandi ke beluka. Beno me mona? Kasi, beno fwana kuzwa bima yango kusala kieleka, ntete.

<sup>71</sup> Na yina ntangu beno ke kuma na bisika yayi mpe beno zaba ti ya me monisama pwelele na beno na nzila ya Ndinga ya Nzambi, na nzila ya luzayikisu, na nzila ya Ndinga yina Nzambi

ke lomba beno na kusala, na yina beno kele na lukwikilu, lukwikilu ya kieleka.

<sup>72</sup> Ntangu yayi, kaka mutindu Abraham ntangu yandi vwandaka na bamvula makumi yivwa na yivwa. Mu banza, na Genèse 17. Nzambi monikaka na kiboba ya bakala yayi, ntangu yayi, na bamvula makumi yivwa na yivwa, ntangu yandi vwandaka na bamvula nkama mosi, bayina vwandaka vingila nsilulu yina bamvula nyonso yayi. Yandi monanaka na yandi na nkumbu ya *El Shaddai*, “Yina kele na mabele.” Mpe wapi ngolo ya vwandaka, kasi nsilulu vwandaka me lungisama ve na ntangu yina. Kasi, “Abraham, mu kele Nzambi ya Ngolo nyonso, *El Shaddai*, ‘Mupesi-Ngolo, Nzambi yina kele na Mabele.’”

<sup>73</sup> Mutindu mu tubaka na beno na ntwala, mutindu mwa bébé yina kele na kiadi, mpe ya kubela, mpe ke dila, mpe yandi ke yekama na zulu ya dibeke ya mama ya yandi. Mpe yandi ke kudia mpe ke benda ngolo ya yandi na mama, samu ti yandi me sepela na ntangu yandi ke na kunwa dibeke, samu nzila mosi kaka yandi ke na yawu mpe zaba kele dibeke ya mama. Yandi zaba nkisi ve. Benolenda pesa yandi nkisi, yandi ke dila mpe ke dila. Benotobola yandi ntunga na diboko, mpe yandi ke ningana ngolo. Kasi mutindu mosi kaka samu na kusepelisa yandi kele dibeke ya mama.

<sup>74</sup> Mpe Yandi tubaka, “Abraham, nge me nuna, ngolo ya nge me kwenda, maboko ya nge me yuma, bubakala ya nge me kwenda, kasi mu kele Mama ya beno. Benosimba kaka nsilulu ya Munu, mpe benosepela na yina beno ke na kuingila. Pema!”

<sup>75</sup> Ntangu yayi, ya kele mutindu konso mukwikidi, ata mutindu yimbi cancer kele na beno, bantangu yikwa beno me vwanda na kiti ya bambevo, nyonso ya bima yina, kaka kana benolenda bakula luzayikisu yina me katuka na Nzambi! Na yina benosepela, na kuzabaka ti ya ke salama, samu ti lukwikilu ke vingilaka na mvibudulu na nsilulu. Benome mona?

<sup>76</sup> Job zabaka ti yandi vwandaka ya kusungama. Ntangu beto ke tala, awa na kati ya Masonuku, ti ya vwandaka . . . bantu yayi kwizaka na yandi; bamambeke ya dibuundu ya yandi. Nyonso yina vwandaka monana ya luzolo na yandi teleminaka yandi, mpe mekaka na kufunda yandi na kuvwandaka musumuki ya kinsweki, samu ti bima nyonso yayi kusalamaka na yandi. Benoke kuwa bantu, kasi bubu yayi, benoke tuba, “Mu me tuba na beno. Benotala yandi! Benome mona yinki. . .?” Ya kele ve nyonso kieleka. Ntangu yankaka ya kele Nzambi ke teza bantu ya Yandi. Na diambu yayi, ya vwandaka Nzambi ke meka Job, muntu ya kulutila mbote yina vwandaka na zulu ya ntoto na ntangu yina. Ntangu yayi, Yandi vwandaka simba yandi kuna, samu ti Yandi zabaka ti Job vwandaka profete yina vwandaka na vision ya Nzambi, ti yandi salaka kieleka yina Nzambi tubaka na

yandi na kusala mpe yandi . . . Nzambi vwandaka ya kukangama na kuzitisa nsilulu ya Yandi na yandi.

<sup>77</sup> Oh! Baklisto nyonso fwana vwanda mutindu yina. Ntangu kunwana ya nsuka ya luzingu ya beto ke kwiza, mpe makelele ya lufwa ke mata na laka ya beto, beto fwana vwanda kaka swi mpe kubambuka moyo ti Nzambi tubaka, “Mu ke vumbula beno dyaka na kilumbu ya nsuka.” Beno me mona? Beto fwana kanga yawu—ti, kimbangi ya beto, kisika ya beto na Klisto, kisika ya beto, yina beto kele, na kuzabaka ti beto me zitisa konso Ndinga ya musiku ya Yandi. “Kyese na bayina ke salaka misiku ya Yandi ti bawu fwana kuzwa muswa ya kukota.” Beno me mona? Mpe ntangu beto zaba, ti ata nyonso yina muntu mosi me tuba, beto me zitisa musiku nyonso yina beto ke mona na kati ya Biblia, ti Nzambi me sala beto . . . me tuba na beto na kusala, na buzitu nyonso, mpe zola, mpe buzitu na Mvangi Yina sonikaka Biblia.

<sup>78</sup> Beto ke tuba, “Bakala mosi sonikaka Yawu.”

<sup>79</sup> “Muntu ya ntama, yina vwandaka tambula na Mpeve-Santu, yina sonikaka Yawu.” Beno me mona? Beno me mona, Nzambi sonikaka Yawu na nzila ya muntu. Mutindu profete ke zonzaka Ndinga ya Yandi, ya kele ve ndinga ya profete, ya kele Ndinga ya Nzambi, beno me mona, na nzila ya profete. Ya kele samu na yina Yawu fwana kusalama, kana ya kele kieleka Kieleka.

<sup>80</sup> Ntangu yayi, beto ke mona muntu ya nene yayi. Mpe, beno bambuka moyo, Job vwandaka ve na Biblia ya kutanga na kilumbu ya yandi. Ve! Yandi landaka kaka lutwadusu ya kimpeve. Yandi vwandaka profete na yandi Ndinga ya Mfumu ke kwisaka. Yandi vwandaka—yandi vwandaka kaka ya kutwadisa na kimpeve, samu ti yandi zabaka kisika ya yandi ti yandi vwandaka profete ya Nzambi. Ntangu yayi, kima kaka yina zolaka salama, vwandaka samu na lutwadusu ya kimpeve na kubula yandi. Mpe kuna yandi zabaka yina yandi tubaka ke salama, samu ti ya vwandaka na nzila ya lutwadusu ya kimpeve.

<sup>81</sup> Ya kele samu na yina dibuundu, kana ya kele samu na ntumunu (samu na kusungika), ya ke kaka . . . ya kele na bamekaniki ya kukubama, ya kele kaka na nsatu kuna ya dynamike. Na nkokila yayi, kana beto zola kukubika mekaniki, beto sungika bantima ya beto, bima yina beto lenda sala, beto landa konso Ndinga, beto landa Yandi na mbotika, beto landa Yandi na lutumu nyonso yina Yandi tubaka na beto na kusala, samu na kukubika bamekaniki nyonso, mpe kutelama kuna; na yina beto me kubama samu na kukota na dynamike, mpe kaka Nzambi lenda sala yawu; mpe yina ke kota na kati ya ntima ya beno lukwikilu yina ke tuba, “Mu me beluka ntangu yayi.” Na yina ya ke sala ata luswaswanu ve na yina mambu kele, beno me beluka na mutindu nyonso; samu ya kele lukwikilu, na lukwikilu beno me beluka.



<sup>82</sup> Yandi vwandaka na nzila ya kimvuka ya ba-communiste na Nzambi, ti yandi vwandaka na nzila ya lutwadusu ya kimpeve. Yandi vwandaka na mutindu ya kutambula yandi mosi, mpe bikaka Nzambi kukota na kisalu. Mpe yandi zabaka ti yandi vwandaka ya kunungisama. Ya vwandaka dikabu, ya vwandaka dikabu samu na bantu; ve samu na Job, kasi samu na bantu. Ya kele samu na yina makabu nyonso ya Kinzambi kele, samu na kusadila bantu ya Nzambi. Muntu nyonso kele ve ya kutuma na kuvwanda profete. Beno nyonso ve. . . kele ve ya kutuma na kusambila samu na bambevo. Bawu nyonso kele ve ya kutuma na kuvwanda ba-pasteur, mpe nyonso yina. Kasi ya kele nzila yina Nzambi me fungula samu na bawu. Mpe ya kele mutindu beto vwandaka na yawu na suka yayi na lesu, ti yandi. . . Bakala yina ke kwenda na lweka samu na kukota na nzila ya muntu yankaka kele ve na kisika ya yandi, wapi mutindu yandi me twadisama na kimpeve, wapi mutindu ya ke monana, wapi mutindu mbote. . . Bantu yikwa vwandaka na lukutakanu na suka yayi? Beto tala diboko ya beno. Beno me mona? Beno me mona, beno lenda ve.

<sup>83</sup> Ya kele na David, kaka ya kutwadisa na kimpeve mutindu yandi lendaka vwanda, bantu nyonso ke boka mpe ke kembila Nzambi, samu na kikuma yina monanaka ya kieleka na Masonuku, kasi yandi vwandaka muntu ya yimbi. Lutwadusu yina ya kimpeve zolaka kwisa na Nathan, David ve. Beno me mona, yandi yufulaka ata fioti ve Nathan. Beno me mona yina salamaka? Beno me mona, beto kele. . . Nzambi tubaka ti Yandi “ke salaka kima ve tii Yandi ke monisa Yawu na bisadi ya Yandi baprofete.”

<sup>84</sup> Mpe Job vwandaka profete yayi na kilumbu yayi. Ntangu yayi, kima mosi kaka Nzambi salaka na Job: Yinki ntangu nionso pesaka yandi ndwenga mpe Ndinga ya Yandi mpe lutwadusu ya kimpeve, yandi lendaka ve kuzwa dibanza ya kimpeve. Kasi yandi zabaka mekaniki ya yandi nyonso (yandi pesaka munkayulu ya kuyoka, yandi salaka nyonso yina yandi zabaka na kusala vwandaka kieleka), kasi yandi lendaka ve kuzwa ndinga ya Nzambi. Kasi diabulu lendaka ve kuningisa yandi! Yawu yina.

<sup>85</sup> Ntangu yayi, beno bawu yayi ntangu ba ke sambila samu na beno. Beno fwana vutuka ve na nzila, to kukwenda bika muntu yankaka kusambila samu na beno. Ntangu beno zaba ti beno me sala kieleka yina Nzambi tubaka na beno na kusala, beno me mona, na yina beno vingila nzila yina ya lutwadusu ya kimpeve samu na kuzibula beno, mpe, “Ntangu yayi mu me beluka!” Ntangu ya ke kulumuka na kati ya beno kuna, na yina diambu me kumana. Oh, beno ke na nsatu ya banzila ya bisambu ve, kima yankaka ve, yimeni! Ya me monisama pwelele na beno! Beno me mona?

<sup>86</sup> Kaka mutindu profete ya kiboba na nkwizulu ya Mfumu Yesu, beto ke mona ti ya vwandaka ya kumonisa na yandi,

ndwenga ya ntama, ti “yandi ke mona ve lufwa tii yandi ke mona Klisto ya Mfumu.” Mpe yandi kwikilaka Yawu, mpe yandi vingilaka Yawu. Mpe bantu banzaka ti yandi vwandaka kilawu, kiboba ya bakala yayi zimbisaka mabanza ya yandi. Kasi yandi kwikilaka Yawu kaka! Kima mosi ve lendaka ningisa yandi na Yawu, yandi zabaka ti Nzambi me monisa Yawu na yandi, samu ti Biblia ke tuba, “Ya monisamaka na yandi na nzila ya Mpeve-Santu.”

<sup>87</sup> Siméon ke na kwiza na Tempelo na minuti yina, me belama mpe me pesa lukumu na Nzambi, mpe me tuba, “Bika ti kisadi ya Nge kukwenda na ngemba.” Ntangu yandi bakaka bébé yango, “Meso ya munu me mona Mpulusu ya Nge.” Beno me mona, yandi zabaka ti yandi zolaka mona Yandi. Ata ti lutangu ya ba-bébé yandi vwandaka kwenda kutala konso kilumbu, yandi zabaka ti Nzambi monisaka na yandi ti yandi zolaka mona Klisto ntete yandi kufwa. Siméon kwikilaka yawu.

<sup>88</sup> Ntangu yayi ntangu ya me monisama na *beno*, ti beno me kuzwa nsilulu ya Nzambi; lutwadusu ya kimpeve, beno kele Baklisto, yawu me bula beno, beno ke na nsatu ya ndonga ya bisambu ve. Kima mosi . . . kima mosi kaka beno ke na yawu nsatu kele ntima ya kuzibuka ntangu mekaniki nionso me kubama, mpe bika lutwadusu ya kimpeve kukota na kati, mpe kuna kima ve lenda soba dibanza ya beno; beno me kuzwa yawu. Na ngaanda ya yawu, ya ke sala ata mbote ve.

<sup>89</sup> Ntangu yayi beno tala, Job vwandaka na nsatu ya nzila ya lutwadusu ya kimpeve, yandi zibulaka yawu. Yandi vwandaka na nzila ya kusolula na Nzambi, na nzila ya lutwadusu ya Yandi ya kimpeve. Yandi vwandaka na mutindu ya kusala yandi mosi na ngaanda mpe bikaka Ndinga ya Nzambi kukota na kati. Beno tala mutindu bawu—mutindu bawu kwizaka yufula yandi na Esete mpe na Wesete, bantu vwandaka sosa yandi samu bawu zaba ti yina Job tubaka vwandaka Kieleka. Bawu zabaka ti muntu yina tubaka Kieleka. Samu, yina yandi pesaka profesi, yawu yina salamaka! Mpe na yawu bantu katukaka na Esete mpe na Wesete.

<sup>90</sup> Yandi tubaka ti yandi ke kwenda kuna na zando, bantinu ya bantwenia ya Esete ke fukama na ntwala ya yandi, kaka samu na kuwa ndinga mosi ya kubomba yina me katuka na yandi, ndwenga ya yandi ya nene mpe ya ngolo, samu ti bawu zabaka ti muntu vwandaka ya kusungama. Yandi vwandaka ve na nsatu ya kukizangula, yandi vwandaka sosa ve ndandu ya yandi mosi, yandi vwandaka sadila ve lukumu ya yandi na ntwala ya bantu, yandi vwandaka kaka profete ya kusungama na ntwala ya Nzambi. Mpe ba vwandaka tula kivuvu na yandi, mpe bantu nionso katukaka na Este mpe na Weste kaka samu na kutuba na yandi na mwa ntangu fioti. Yandi me tubila, na kati ya Biblia awa. Kasi, beno me mona, yandi vwandaka kondwa

lutwadusu ya kimpeve samu na kutuba na yandi yina nionso yayi vwandaka. Nzambi bikaka yawu kusalama, tubaka na yandi ve.

<sup>91</sup> Na yina, kilumbu mosi, beto ke mona ti na kati ya yawu, ya kele ntangu yina. . . Muntu nyonso, ntangu nyonso yina beno lenda sadisa bawu, “Mbote mingi.” Kasi ntangu ba ke zola kuwisana ve na nge, ya kele ntangu mpasi ke kota. Kasi yandi kaka zabaka ti yandi vwandaka ya kusungama; kubula ya ntima ya yandi ya lukwikilu, ya kuwa Ndinga ya Nzambi kuzonza na yandi, yandi zabaka ti Yawu vwandaka Kieleka. Yinga, tata! Yandi zabaka Ndinga ya Nzambi. Muntu mosi ve lungaka sakana na yandi na Yawu, samu yandi zabaka Yawu. Ya. . . Kasi ntangu nyonso yina beno. . . kima mosi ke monisama na beno, mu banza ya kuswaswana na yina bantu ke banzaka. . . Ntangu yayi, mu ke na kuzonzila na nzila ya baprofete. Ntangu ya kele Nzambi ke monisaka kima mosi, na yina, kana ya kele na kinsweki yina me katuka na Nzambi na kuzabana na bantu, ya ke luta ata fioti ve na seminere, ya ke luta ata fioti ve na kimvuka ya bantu, ata fioti ve. Ya ke vwanda ntangu nyonso, na, mpe ke sala, na nzila ya muntu mosi, profete! Amos 3:7, beno me mona, “Mfumu ke salaka kima ve kana ntete Yandi monisa Yawu na nzila ya baprofete ya Yandi.”

<sup>92</sup> Mpe, ntangu yayi, Job vwandaka na kima mosi ya yimbi na yandi, kasi yandi lendaka ve kuzwa lutwadusu ya kimpeve na zulu ya yandi, mpe yawu vwandaka kukiyangisa samu na yandi, mpe ti. . . ntangu beno ke kota na mutindu ya dyambu yina, ya kele ntangu mbeni ke kota na konso nkundi, na kutala, beno me kuzwa. Mpe bawu bandaka na kufunda yandi. Oh, ya zolaka vwanda kima ya mpasi samu na yandi na kuzaba bankundi ya yandi yina fundisaka yandi, Satana na manima ke kwenda mpe ke vukana yandi mosi na mbeni. Ya kele ntangu Satana ke kwiza, “Ti mu kuzwa yandi, mpe mu ke sala ti yandi kusinga Nge na ya Nge. . . Mu ke sala ti yandi kumanga Nsangu ya yandi. Mu ke sala ti yandi kusinga Nge. Mu ke vutula yandi mpe ke tuba ‘Ya vwandaka nyonso yimbi.’” Na yina yandi mekaka yandi na nyonso yina yandi lendaka, na muntu nyonso ya nene mpe bankundi yina yandi vwanda kuzwaka. Kasi Job telemaka na makulu mwasi, samu yandi zabaka ti yandi kuwaka Ndinga ya Nzambi!

<sup>93</sup> O Nzambi, sadisa, mbasi na nkokila, ti mu lenda baka *Mapapu Ya Yembe* yina. Mu kuwaka Ndinga ya Nzambi yina tubaka kima mosi, mpe yawu ke salama mutindu yina! Kaka mutindu bima yankaka yayi me salama, ya ke salama!

<sup>94</sup> Ntangu yayi, Job zabaka ti ya zolaka kusalama. Mpe yandi zabaka ti Nzambi tubaka na yandi ti, ti yandi vwandaka “muntu ya kudedama.” Kasi bawu salaka yandi musumuki, na yawu yandi vingilaka kuna samu na lutwadusu ya kimpeve. Satana kotaka na kati ya bantu nionso mpe yandi kwisaka kuna. . . bikindisi ya yandi, mutindu ba vwandaka bokila bawu, mpe ba

vwandaka funda yandi, kasi ya simbaka yandi ata fyoti ve. Kasi ntangu Ndinga ya Nzambi kumaka ya kusiamisa na yandi. . . Yandi kuwaka na Nzambi na nzila ya kuwa dikutu, kasi kilumbu mosi ya kuvwanda na kisika ya yandi ya yisi mingi. . . Mpe na yina yandi vwanaka ya kuvwanda kuna, mpe muntu nyonso vwanaka manga yandi, ata mpe kento ya yandi vwanaka tuba na yandi ti yandi vwanaka “na kifu,” yandi vwanaka kwanza bamputa ya yandi. Mpe Elihu kwisaka kuna mpe sembaka yandi ti yandi vwanaka muyimi, samu ti ya vwanaka funda Nzambi mutindu yina mpe nionso yina.

<sup>95</sup> Mpe kuna na ntangu yina ya vwanaka ntangu lutwadusu ya kimpeve bulaka yandi, ya kele ntangu bansemo bandaka na kulezima, banzasi bandaka na kungana, ya kele ntangu lutwadusu ya kimpeve bulaka profete, mpe yandi telamaka, mpe yandi tubaka, “Mu zaba ti Mukudi ya munu kele moyo! Mpe na bilumbu ya nsuka Yandi ke telama na zulu ya ntoto yayi. Ata ti misobi me bebisa nzutu yayi, kasi na nzutu ya munu mu ke mona Nzambi, Yina mu ke mona munu mosi.”

<sup>96</sup> Yandi monaka. . . Yandi vwanaka zonzila na bayinti, lizingu ya bayinti, mutindu ya ke kufwaka mpe ke zinga dyaka; maza ke vutulaka dyaka yawu, nsunga ya maza, nsunga ya maza, bandandu ya maza ke na kutiamuka na zulu ya yinti to kima mosi, nkuna yina me kwenda na ntoto. Yandi tubaka, “Kasi muntu ke lalaka mpe yandi ke fwa, bana ya yandi kuzwa lukumu mpe yandi ke zaba yawu ve. O ti Nge ke bumba munu na ntoni” (Job 14) “tii nganzi ya Nge ke luta.” Yandi tubaka, “Kasi kana muntu kufwa, yandi ke zinga diaka? Bantangu nionso ya lizingu ya munu, mu ke vingila tii kuna nsobolo ya munu ke kwisa. Nge ke bokila munu, mpe mu ke pesa mvutu. Nge me talisa ti mu me kanga ntima ve,” nionso yina. Yandi zabaka bima nyonso yayi. Yandi vwanaka tala mbote yinti kuzinga, kasi yinki ke salamaka na muntu ntangu yandi kufwaka? Yandi vumbukaka dyaka ve. Na yawu, Nzambi vwanaka lakisa yandi Mukudi yayi.

<sup>97</sup> Yandi zolaka kumona kana ya vwanaka na muntu yina zolaka sambila samu na yandi. Yandi sambilaka samu na bantu mingi, kasi ntangu yayi ya kele na muntu lenda zonga samu na yandi? Muntu mosi lendaka tula diboko ya yandi na Job, to na zulu ya muntu ya masumu mpe Nzambi ya Santu, mpe kusala kiamvu mutindu yina? Yandi lendaka kwenda na yinzo ya Yandi mpe kukonkota na kielo? Yandi lendaka zibula kielo mpe kusolula na yandi mwa ntangu fioti?

<sup>98</sup> Kasi, na yina, ntangu lutwadusu ya kimpeve kubwaka na kati ya ntima ya yandi, na yina yandi lendaka mona Nzambi. Bansemo vwanaka sema, nzasi vwanaka duma. Mpe ntangu ya salaka mutindu yina, yandi telemaka, mpe yandi tubaka, “Mu zaba ti Mukudi ya munu kele moyo! Mukudi ya munu, mpe na bilumbu ya nsuka Yandi ke telama na zulu ya ntoto.” Beno me

mona, yandi bandaka na kumona mvutu ya Nzambi na lukwikilu ya yandi.

<sup>99</sup> Ntangu yayi, beto ke kukiyufula kana beto lendaka mona Nzambi. Ya kele na mutindu yina beto lendaka mona Yandi? Ntangu yayi, ya vwandaka kaka mutindu Nzambi vwandaka na yawu, na kumekaka Job. Yandi tubaka, “Mu me kuwa Nge, na kuwa ya dikutu, kasi ntangu yayi mu me mona Nge. Kasi ntangu yayi mu me mona Nge, na meso ya munu.” Vision ya yina ke monikaka ve monisamaka pwelele. Yandi monaka dituti kubaluka, yandi kuwaka kulezima ya nzasi, to monaka yawu. Mpe monaka kubaluka ya nzasi, mu banza na kilumbu ya kitoko, mpe yandi monaka Nzambi vwandaka na dituti yina mpe na bansemo yina. Yandi lendaka mona Nzambi, na meso ya yandi ya kimuntu. Beno me mona, samu ti yina ke monikaka ve na meso yina ke monanaka pwelele. Vision yina me monana na bayankaka vwandaka kuna ya kusiamisa, pwelele, na disu ya kimuntu.

<sup>100</sup> Kaka mutindu lukwikilu na bisalu, mutindu beto zonzilaka mazono na nkokila. Abraham, ve. . . vwandaka ve na Biblia ya kutanga to, kasi yandi vwandaka profete, vision ya yandi mpe lukwikilu ya yandi. Mpe ya monanaka yimbi na bantu yankaka ti yandi zolaka banza mutindu yina, ti yandi zolaka banza ti ba ke kuzwa bébé. Kasi ba vwandaka na bébé yango, samu vision ya yandi ya bébé vwandaka yina yandi vwandaka zonzila, “Mu ke kuzwa yawu! Mu ke kuzwa yawu!” Kasi ntangu bébé butukaka, na yina bantu yankaka lendaka mona na disu yina yandi monaka na kati ya vision. Mpe ntangu beno ke sala mambu na zulu ya yina beno ke kwikilaka na kati ya ntima ya beno, na yina bantu zaba Nzambi, mpe zaba yina ke salama na beno, na mutindu beno ke sala. Ya kele mutindu beno ke mona Nzambi na meso. Kasi na yandi, nyonso yina yandi salaka yina vwandaka mbote, nyonso yina yandi salaka samu na bantu yankaka, yandi vwandaka na nsatu ya muntu samu na kusambila samu na yandi. Ntangu mbutukulu ya bébé kwisaka, Isaac, lutwadusu ya kimpeve yina twadisaka yandi na yayi siamisaka vision ya yandi na kisika bantu lendaka mona yina yandi monaka na vision vwandaka kieleka.

<sup>101</sup> Ntangu yayi, bantangu yankaka bakubula ya nene ya ntima ya lukwikilu yayi ke kwizaka kaka na ntangu ya mpasi. Ya kele ntangu nyonso mpasi yina ke twadisaka beto na kati ya yayi. Ya vwandaka dyambu ya mpasi yina nataka Job na kati ya yawu. Na yina, yandi vwandaka na nsuka ya luzingu ya yandi. Bana ya yandi kufwaka; bakamela ya yandi. Mpe bima ya yandi nionso kwendaka mpe bebaka. Mpe luzingu ya yandi mosi, bamputa fikaka yandi kubanda na yintu ya yandi tii na makulu. Ya vwandaka mpasi, ti ba vwandaka pusa yandi, ya kele kisika yina lutwadusu ya kimpeve bulaka yandi.

<sup>102</sup> O babakala mpe bakento, na nkokila yayi, kana beno

lendaka tala na nziunga mpe kumona wapi mutindu beto me kuma pene-pene ya Nkwizulu ya Mfumu. Beno bayina me katula mbotika ya Mpeve-Santu. Beno mu banza ti beno ke vutuka na zulu ya sensation mosi, to kima yina beno salaka yina Satana lenda mekula, mpe beno lenda ve kuzwa Mpeve ya kieleka na kati ya beno samu na kukwenda nzila nyonso na bansilulu ya Nzambi. Wapi mutindu muntu yina ke tubaka ti yandi kele na Mpeve-Santu ke manga Ndinga mosi ya Biblia yayi, na kuvwandaka, “ve kieleka”? Beno lenda ve kusala yawu!

<sup>103</sup> Ata ti beno kele musambidi, mabuundu yikwa beno me kotaka, babuku yikwa beno me tulaka nkumbu ya beno, kana Mpeve-Santu yina ya kieleka kele na kati ya beno (yina kele Ndinga yayi me monisama), beno ke mona Nsangu mpe ngunga, samu ti ya kele Mpeve-Santu yina ke salaka yawu. Kasi ya fwana vwanda na kima mosi nsemo yina me katuka, lutwadusu ya kimpeve ke bula beno. Mpe kana ya kele . . . kana beno mwangisa masa na zulu ya ntoto, na zulu ya ntoto, na zulu ya ntoto, mpe ya kele ve na nkuna na kati kuna samu na kubula yawu, wapi mutindu ya lendaka buta kima mosi? Ya kele ve na kima kuna samu na kubuta. Ya kele, kaka Musolami ya Nzambi ke mona Yawu.

<sup>104</sup> Musolami ya Nzambi monaka Yawu na ntangu ya Noé, na ntangu ya Moise, na ntangu ya Yesu, na ntangu ya bantumwa, Na ntangu ya Luther, na ntangu ya Wesley, na ntangu ya Pentecote, samu ti ya vwandaka Nkuna yina vwandaka na zulu ya ntoto ntangu lutwadusu yayi ya kimpeve tiamukaka. Ntangu yayi na yina lutwadusu ya kimpeve ke tiamuka, samu na kuvukisa Kento ya makwela kintwadi, ya kele kaka bayina Soolamaka ke mona Yawu. Yesu tubaka, “Mu ke tonda Nge, Tata, ti Nge bumbaka bima yayi na meso ya bantu ya ndwenga mpe ya mayele, mpe me monisa Yawu na bana yina zola kulongoka.” Ntangu yayi, dibanza ya kimpeve fwana bula yawu.

<sup>105</sup> Ntangu yayi, ntangu lutwadusu ya kimpeve bulaka yandi, yina salaka yawu. Yandi vwandaka na Yawu na ntangu yina! Ntangu yayi, beto ke mona ti, ya ke na ntangu mosi ya mpasi yayi ntangu ngolo nionso ke na kusalama. Mpe beno ke tala bisika nyonso bubu yayi, beno tala mutindu beto ke na kuzinga. Beto ke na kuzinga ve na Sodome ya bilumbu yayi mpe Gomorrhe ya bilumbu yayi? Yinza me vutuka ve? Yina vwandaka yinza ya Bantu ya makanda yina ba bebisaka kuna, na nzila ya tiya. Yesu tubaka ve, na Santu Luc, kapu 17, na nzila ya 28, 29, mpe nzila ya 30, ti, “Mutindu ya vwandaka na bilumbu ya Sodome, mutindu mosi ya ke vwanda na nkwisulu ya Mwana ya muntu, ntangu Mwana ya muntu ke monisama”? Yinki kele “me monisama”? Ya kele kinsweki yina me zabana, luzayikisu; ya kele kotalisa to kuzabisa kinsweki mosi.

<sup>106</sup> Ntangu yayi, bima yayi yina ba bumbaka na bansungi nyonso ya dibuundu kele ntangu yayi ya kumonisama, ya

kuzabana. Ntangu yayi, beto lenda tuba yawu, mpe kana Nzambi me vutukila yawu ve, ya kele luvunu. Beno me mona, Nzambi kele na nsatu ya muntu ve samu na kutendula Ndinga ya Yandi, Yandi kele Mutendudi ya Yandi Mosi. Yandi tubaka, “Mwense mosi ke kuzwa kivumu,” mpe yandi kuzwaka yawu. Yandi tubaka, “Ti nsemo kuvwanda,” mpe ya vwandaka. Mpe beto ke na kuzinga ve na nsungi ya Luther, na nsungi ya Wesley, to na nsungi ya Pentecote. Nsungi ya Pantekote vwandaka kaka kuvutuka ya makabu kuvutuka na dibuundu, kasi beto ke na kuzinga na ntangu ya nkokila, beto ke na kuzinga na ntangu ya kubokila Kento ya makwela.

<sup>107</sup> Mpe kaka mutindu ya vwandaka mpasi samu na bantu ya Katolika na kumona Luther, mpe ya Luther na kumona Wesley, mpe Penteco- . . . nsungi ya Wesley samu na kumona nsungi ya Pentecote, mutindu mosi ya kele mpasi samu na ba-Pentecotiste na kumona nsungi *yayi*. Ya ke vwandaka ntangu nyonso mutindu yina, samu ti Yawu me tiamuka na zulu ya Nkuna Yina ba soolaka, mpe ya kele kaka yina. Ya kele yina Biblia ke longaka. Bawu lenda ve kumona Yawu, Yesu mpe sambilaka samu na bawu, tubaka, “Bawu vwandaka mpofu, bawu zabaka yawu ve.” Apocalypse me tuba na beto, na nsungi ya dibuundu ya Laodicée yayi, ntangu ba tulaka Yandi na ngaanda ya dibuundu, ti bawu kele “kinkonga! mputu! mawa! mpofu! mpe zaba yawu ve.” Na manima dyaka, bawu lenda ve kumona Yawu, bawu lenda ve kubakula Yawu. Bawu me kota na malembe mingi na binkulu!

<sup>108</sup> Kasi beno bambuka moyo na Ndinga ya Nzambi ya nsilulu na yinwa ya Yesu Klisto, Nzambi yina samunaka luvangulu na luzingu, Yandi vwandaka Mosi ntete mbandukulu ya yinza yina zonzaka Bandinga, “Mpe ti ya vwanda,” mpe ya vwandaka. Samu Yandi tubaka, “Yandi vwandaka na yinza, mpe yinza kusalamaka na nzila ya Yandi, mpe yinza zabaka Yandi ve. Kasi bayina nionso zabaka Yandi, na bawu Yandi pesaka ngolo na kukuma bana ya Nzambi.” Mvangi ya kieleka, mpe Mvangi ya kieleka Yandi mosi, ntangu Yandi vumbulaka Lazare na lufwa, Yandi tubaka, “Beni banza ti yayi ke yitukisa ve, samu ti ngunga ke na kwiza ti ntangu bayina nionso kele na ntoni ke kuwa Ndinga ya Mwana ya muntu, mpe ke basika.” Nzambi yina tubaka “Bika tí Nsemo kuvwanda,” tubaka “Ndinga ya Mwana ya muntu lunga vumbula bayina kele na ntoni.” Ya fwana salama na kati ya nsungi ya yawu. Yandi zonzaka, “Ti ya vwanda na bakala mpe kento,” mpe nyonso yina, mpe nyonso yayi, bamvula mpe bankama ya bamvula ntete ya salama.

<sup>109</sup> Dibanza ya kimpeve simbaka profete Ésaïe, yandi tubaka, “Na beto mwana me butuka, mwana me pesama. Ba ke bokila Yandi Konye, Ntinu ya Ngemba, Nzambi ya Ngolo nionso, Tata ya kukonda nsuka.” Bamvula lutaka, bangonda, bamvula, basabala, bamvula lutaka, bankama ya bamvula lutaka. Bankama nana ya bamvula na ntwala, Emmanuel

kubutamaka na nzila ya mwense! Samu na yinki? Ya kele samu ba zonzaka yawu na nzila ya bikoba ya profete ya Nzambi yina ba me pakula, nkuna basikaka. Beno me mona? “Mpe ngunga yina ya nene,” yandi tubaka, “beno ke sosa. . . beno yufula Munu vision to kidimbu mosi.”

<sup>110</sup> Yandi tubaka, “Mu ke pesa bawu kidimbu mosi, kidimbu ya kukondwa nsuka, ‘Mwense mosi ke kuzwa kivumu,’ kidimbu ya kukondwa nsuka.”

<sup>111</sup> Ntangu yayi, beto ke mona ti na bangunga yina ya mpasi mingi, ya kele ntangu nyonso ntangu Mpeve ya Nzambi ke kota. Yandi bikaka bana ya ba-Hebreux kutambula na dibulu ya tiya, na ntwala Yandi tambula na diboko. Kasi ntangu Yandi vwandaka kwenda, Yandi vwandaka kwenda.

<sup>112</sup> Ntangu yayi, beto ke tala awa ti na Luc, kapu 17, mpe na nzila ya 30, ti Yandi tubaka, “Na bilumbu ya nsuka, ti Mwana ya muntu ke monisama Yandi mosi mutindu Yandi salaka kaka na ntwala ya Sodome na Gomorrhe, mpe mutindu mosi ke zinga.” Yandi tubaka na yina me tala Moise, samu. . . mpe beno lemvokila munu, na yina me tala Moise ve, kasi samu na Noé. Mutindu ti bantu vwandaka “kudya, vwanda kunwa, mpe nyonso yina, vwanda kwela mpe vwandaka pesa na makwela.” Na manima Yandi kwisaka, Yandi tubaka, “Ntangu yayi, mutindu ya vwandaka na bilumbu ya Lot, mutindu mosi ya ke vwanda na ntangu yina Mwana ya muntu ke monisama.” Ntangu yayi, beno tala mbote, Mwana ya muntu monisamaka na kimvuka ya Abraham, mutindu Muntu, Profete na mutindu ya nzutu ya muntu, Muntu ya mutindu nyonso na fundu-fundu na bilele ya Yandi, mpe Abraham bokilaka Yandi “Elohim.”

<sup>113</sup> Ntangu yayi, Yesu silaka awa ti na bilumbu ya nsuka Mwana ya muntu ke monisama diaka na mutindu mosi ya kimvuka yina, Nkuna ya kimfumu ya Abraham, kaka ntete tiya kubwa. Beno bambuka moyo, ata mbala mosi ve ti dibuundu kuzwaka kimbang'i mosi dyaka, Abraham mpe bayankaka kuzwaka ve, mwana ya nsilulu yina ba vwandaka sosa ba nataka bawu ntama mingi na manima ya yawu. Mpe dibuundu ke sosa Mwana ya nsilulu, Yandi ke kwisa kaka na manima ya bilumbu ya ministere yayi, Yandi ke monisama na mazulu. Ntangu yayi, beto ke mona yawu pwelele, ya fwana vwanda. Ntangu yayi, kima mosi kaka ya fwana vwanda na kubula ya ntima, kima mosi ke kota na kati ya muntu mosi, Nzambi ke siamisa mpe ke tuba na yandi mpe ke lakisa yandi ti ya kele kima yina ke salama; mpe ti nge ke. . .

<sup>114</sup> Mutindu Moise salaka, yandi zolaka vulusa bana yina ve, kasi Nzambi tubaka na yandi na mulaka ya tiya. Yandi zolaka ve kukwenda, kasi yandi zolaka kwenda. Moise kuwaka Yandi kuvwanda Yehowa ya nene. Kasi kuna yandi zolaka mona Yandi, Yandi vwandaka na mutindu ya Dikunzi ya Tiya. “Mu me kuwa



Nge, kasi ntangu yayi mu me mona Nge.” Yinki Yandi monaka na kati? Ndinga ya Yandi siamisamaka.

115 Nzambi tubaka na Abraham ti “bantu ya yandi ke zinga na yinsi ya nzenza bamvula nkama yiya, kasi Yandi ke basisa bawu na diboko ya ngolo.”

116 Mpe, beno tala, mulaka yayi ya tiya pesaka kimbangi na yina profete Abraham tubaka ti zolaka salama. Moise tubaka, “Mu me kuwa yawu, kasi ntangu yayi mu me mona yawu!”

117 Ntangu yayi, *beto me* kuwa ti na bilumbu ya nsuka ti Mwana ya muntu ke kwiza na kati-kati ya bantu ya Yandi mpe ke kukimonisa Yandi mosi na bantu na mutindu mosi yina Yandi salaka na...kaka na ntwala ya kubeba ya Sodome. Mwana ya muntu, yinki Yandi salaka? Yandi zabaka mansweki yina vwandaka na kati ya ntima ya Sarah. Mpe pesaka nsilulu na Abraham. Abraham kuwaka Ndinga ya Nzambi, yandi lendaka mona Yandi na mitindu mingi (Mu zaba ve mutindu Yandi zonzaka na yandi, na nzila ya bandosi to na nzila ya baprofesi), kasi na ntangu yayi yandi monaka Yandi. “Mu me kuwa Nge, ntangu yayi mu me mona Nge.”

118 Mpe dibuundu kuwaka na Nzambi, ba tangaka na Yandi, mpe yina Yandi salaka, mpe bansilulu Yandi salaka, kasi ntangu yayi beto ke mona Yandi na meso ya beto (kaka mutindu Job salaka), “Mu me kuwa Nge, kasi ntangu yayi mu me mona Nge.” Oh! Wapi mutindu ya luswaswanu.

119 Moise, na kati ya mipasi yina, bokaka. Mpe beto ke mona ti, na Exode, kapu 14, na nzila ya 13 mpe tii na nzila ya 16, Moise na kati ya kitembo yina ya nene kuna na bana ya Israel, lutwadusu ya kimpeve simbaka yandi, mpe yandi tubaka yina yandi zolaka tuba, na kuzabaka ve ti yandi tubaka yawu. Beno me mona, “Beni vwanda swi mpe beno mona mpulusu ya Nzambi.” Nzambi tubaka na yandi ntete ve. Beno me mona, lutwadusu ya kimpeve bulaka yandi.

120 Bawu tubaka, “Samu na yinki nge me basisa beto awa? Beto fwana kufwa na Egypte. Ya vwandaka samu ti ya vwandaka ve na bantoni kuna? Nata beto awa, mpe beto kufwa; beto zolaka zinga na ngemba mutindu bampika tii kuna beto ke kufwa, kasi nge basisaka beto awa.”

121 Moise, profete, zabaka ti yandi vwandaka na muswa ya Nzambi, vwandaka ya kutwadisama na kimpeve, mpe yandi tubaka, “Beni vwanda swi mpe beno ke mona mpulusu ya Nzambi; samu ti ba-Egyptien nge ke na kutala bubu yayi, nge ke mona bawu diaka ve.” Wapi mutindu yandi zabaka ti ya zolaka salama? Wapi mutindu yandi zabaka? Yandi zabaka ve yina yandi zonzaka.

122 Kasi na mbala mosi na manima yandi me zonza yawu, Nzambi tubaka na yandi mutindu ya kusala yawu. Yandi tubaka, “Moise, kudila ve na Munu, baka nkawa ya nge na diboko ya

nge mpe tula yawu na mubu, mpe tuba na bana ya Israël na ‘Kutambula!’” Amen!

<sup>123</sup> Lutwadusu ya kimpeve! Yawu yina mutindu yawu ke bula beno kana beno kele mbevo. Yawu yina mutindu yawu ke bula beno kana beno kele na mpasi. Kima mosi me monisama na beno, mpe beno ke mona ti ya me monisama, beno ke tuba, “Mu me beluka!”

<sup>124</sup> Na yina Nzambi ke tuba na beno yinki kusala, “Telama mpe banda na kutambula.” Amen! Na yina ya me manisa, ntangu beno lenda sala yawu mutindu yina. Ya kele mutindu Nzambi ke salaka yawu, kuna beno ke mona Nzambi monisama na nzila ya beno mosi.

<sup>125</sup> Ya vwandaka Nzambi yina tubaka na yandi na kusala yawu. Ntangu yayi, na yina, bayina nionso vwandaka awa, Israel nionso yina vwandaka kuna monaka lutwadusu ya kimpeve yina simbaka Moise. Ba monaka Nzambi, na disu ya bawu mosi, na mupepe ke ningisa masa na lweka mosi na yankaka. Mpe Dikunzi ya Tiya yina twadisaka bawu mbala mosi na simu ya nzadi. Yandi kuwaka Nzambi, na manima bawu monaka Nzambi.

<sup>126</sup> Josué vwandaka na ngunga mosi ya mpasi, ntangu basoda vwalanganaka, mpe mwini vwandaka dinda. Josué vwandaka profete, mpe yandi zabaka ti kana basoda yina kuzwaka siansi ya kuvukana diaka mpe kukwisa nwanisa yandi, yandi ke zimbisa bantu mingi, na yawu na ngunga yina ya mpasi ntangu kima mosi ke salama. . . Ya kele kaka na kima mosi, kana yandi lendaka nata bawu na kukima mbangu, yandi ke bebisa bawu, bawu nionso, kuna. Kasi ya vwandaka ve na nsemo mingi samu na kusala yawu, na yina Josué telamaka, yandi telemisaka maboko ya yandi, yandi tubaka, “Mwini, telema kuna! Mpe ngonda, vwanda na zulu ya Ajalon tii mu ke manisa bitumba yayi.” Mpe mwini telema kuna. Bawu kuwaka Josué kuzonza, mpe kuna bawu monaka Nzambi, na meso ya bawu mosi, na kisalu. Kieleka!

<sup>127</sup> Beno me mona, ya kieleka, ya vwandaka diambu ya ngitukulu na kumona kima yina ke monana ti ya lendaka salama ve, kasi ya kele kieleka. Kasi, “Mwini telamaka swi,” me tuba Biblia. Mu zaba ve yina beno bantu ke banzaka, yina ke banzaka ti yinza vwandaka kima, ntangu yayi; kasi, na mutindu nyonso, “mwini telemaka swi.” Ya lendaka vwanda ti Josué mekaka ata fioti ve na kubakula wapi mutindu yandi zolaka ku—kusala yawu, wapi mutindu Nzambi zolaka kusala yawu, kima kaka yina yandi tubaka vwandaka, “Mwini ke telamaka kuna!” Yandi tubaka yawu, mu banza na kuzabaka ve yina yandi vwandaka tuba, samu ti ya vwandaka Nzambi yina pesaka yawu na yandi, mpe Yandi salaka.

128 Kima mutindu mosi na Marc 11:23, “Kana beno tuba na mongo yayi ‘katuka awa,’ mpe beno tula ntembe ve na kati ya ntima ya beno, kasi beno kwikila ti yina beno tubaka ke salama, beno lenda kuzwa yina beno me tuba.” Kasi beno lenda ve kutelama kuna kuzonza kuzonza yimbi na dibanza ya beno mpe kutuba yawu, beno fwana vwanda ya kutwadisa na kimpeve na kutuba yawu. Amen!

129 Beno lemvokila nzonzolo; kasi kilumbu yina, ya kuvwanda kuna na kati ya mfinda yina (mpe Nzambi Zuzi ya munu, mpe mu lendaka kubwa na zulu ya chaire yayi), ntangu Masonuku yina kangaka munu luzingu ya munu nionso. . . mu vwandaka kuna na suka yina na kati ya mfinda, mpe mu vwandaka banza na yawu, mpe Ndinga yina tubaka na munu, Yandi tubaka, “Disonuku yina kele mutindu Masonuku nionso, Ya kele kieleka.”

130 Mpe mu banzaka, “Mbote, wapi mutindu ya lendaka vwanda?”

131 Mpe Yandi tubaka, “Nge kele. . .” Mu tubaka. . . Yandi tubaka, “Tuba, mpe ya ke vwanda mutindu yina. Kutula ntembe na Yawu ve.”

132 Mpe mu vwandaka solula na Muntu mosi, ya kuvwanda kuna na kati ya mfinda. Bampadi vwandaka ve, mu vwandaka kuna bilumbu tatu, ya vwandaka na bampadi kuna ve. Mpe mu vwandaka ya kuvwanda na sycamore de fer ya nene. Bampadi ke kwisaka ve. . . muntu yina ke zomba bampadi, zaba ti bawu kele ve na kati ya sycamore. Mpe mu vwandaka ya kuvwanda kuna; mpe mupepe vwandaka bula ngolo mingi, pene ya ngunga kumi na suka, mpe mu vwandaka banza dyaka.

133 Mpe Yawu tubaka, “Nge ke na kuzomba, mpe nge ke na nsatu ya bampadi kaka mutindu mosi Abraham vwandaka na nsatu ya dimeme ya bakala.”

134 Mu banzaka, “Yina ke tubaka na munu ntangu nionso Kieleka, kasi yayi ke monana ya ngitukulu.” Mpe mu telamaka kisika mu vwandaka, mu talaka bisika nyonso, “Wapi kisika Muntu yina vwandaka zonga na munu?” Kima mosi ve; mupepe vwandaka fula kaka ngolo mingi. Mpe mu banzaka, “Ya lendaka vwanda mu me kubwa na mpongi mpe mu me lota yawu? Ve, mu vwandaka ve ya kulala. Mu vwandaka ya kuvwanda na zulu ya yinti kuna, mu vwandaka tala, mu zolaka baka Mpangi Wood mpe Mpangi Sothmann na manima kuna, kaka na mwa ntangu fyoti, pene ya ngunga kumi na suka. Ba-fermier bisika nyonso kuna vwandaka sala, na kubakaka disangu ya bawu.”

135 Mpe mu kuwaka dyaka Yawu, kutuba, “Nge ke na kusosaka, mpe nge kele na nsatu ya baniama. Yikwa nge kele na nsatu?”

136 Mpe mu banzaka, “Ntangu yayi, mu ke zola diaka ve kulutila yayi, mu ke lomba kaka bampadi tatu, bampadi tatu. Mu zola ntwenya, bampadi tatu ya mbwaki. Mu zola ya yawu.”

137 Yandi tubaka, “Na yina zonzila yawu.”

138 Mpe mu tubaka, “Mu ke kuzwa bampadi ya ntwenya tatu ya mbwaki.”

139 Yandi tubaka, “Wapi nzila bawu ke kwiza?”

140 “Mbote,” mu banzaka, “Mu me kwenda ntama mingi, ya kele na Kima mosi ke na kuzonzaka na munu awa.” Kaka mutindu beno ke kuwa munu kuzonza. Mpe Nzambi na Mazulu, na Biblia yayi na zulu ya ntima ya munu, zaba ti ya kele kieleka. Mpe Yandi. . . Mpe mu tubaka, “Mbote, . . .” Mu bakaka kisika ya buzoba, divala mosi ya ntama ya kuyuma yina vwandaka ya kukangama kuna (pene ya ba-mètre nkama tanu, kisika mu bulaka munduki ya munu).

141 Mu tubaka, “Ya ntete ke vwanda kaka kuna,” mpe yandi vwandaka kuna.

142 Mu nikumunaka meso ya munu mpe mu talaka na manima (Mu me balula yintu ya munu), mpe mu banzaka, “Mu zola ve kubula vision.” Na yina mu talaka diaka na nziunga, mpe ya vwandaka na mpadi. Mu losaka disasi mosi na munduki ya munu, kuna na zulu, mpe mu lendaka mona disu ya yandi ya ndombe, mpadi ya ntwenya ya mbwaki. Mu banzaka, “Mu—mu. . . mu banza ti mu kele ya kulala, mu—mu ke vumbuka na baminuti fyoti. Beno me mona, mu ke na kulotaka ndosi samu na yayi.” Na yina, mu ludikaka, mu bulaka mpadi mpe yawu kubwaka na kintala. Mu banzaka, “Mbote, mu zaba ve.” Mu banzaka, “Mbote, mu lenda kwenda kuna mpe kusosa yawu?” Mpe—mpe mu kwendaka kuna, mpe kuna ya vwandaka ya kulala kuna. Mu lokotaka yawu mpe menga basikaka na yawu. Vision ke basisaka menga ve, beno zaba. Na yawu mu lokotaka yawu, mpe ya vwandaka mpadi. Mu vwandaka ya kulemba mingi, bisika nyonso.

143 Mpe mu talaka na nziunga, mu tubaka, “Nzambi, ya vwandaka Nge!” Mu tubaka, “Matondo na Nge, samu na yayi. Ntangu yayi mu ke basika mpe. . .”

144 Yandi tubaka, “Kasi nge *tubaka!* Nge ke tula ntembe na yina nge me tuba? Nge tubaka ti nge ke kuzwa ‘tatu.’ Ntangu yayi wapi kisika yankaka ke katuka?”

145 Mu banzaka, “Mbote, kana mu ke na kulotaka ndosi, mu ke landila na kukwenda.”

146 Na yawu mu—mu tubaka. . . Mu bakaka poto mosi ya ntama na zulu kuna, ya yinti yina vwandaka nyonso ya kifuluka na matiti yayi ya kintanta awa. Beno ke kuzwa ata mbala mosi ve mpadi na kati ya yawu. Na yawu mu tubaka, “Yina ke landa ke basika kaka na matiti yina ya kintanta,” mpe kuna vwandaka mpadi yina ya ntwenya ya mbwaki yina vwandaka tala munu. Mu tulaka munduki ya munu na ntoto, mpe mu nikumunaka meso ya munu. Mu balukaka diaka, mu banzaka. . . Yandi vwandaka

kuna, yandi balulaka yintu ya yandi na lweka. Mu kubulaka mpadi, mpe kuna mu bandaka na kukwenda na yinzo.

147 Kasi yandi tubaka, “Nge tubaka ‘tatu’! Nge ke tula ntembe na yina nge me tuba?”

148 Mu tubaka, “Ve, Mfumu, mu ke tula ntembe ve na yina mu tubaka, samu ti Nge ke na kusiamisaka.”

Yayi kele Disonuku mosi yina kangaka munu: “Ve kana *Mu* tuba, kasi kana *beno* tuba.” Ve kana *Yesu* tubaka yawu, kasi kana *beno* tuba yawu beno mosi.

149 Mpe mu banzaka, “Na mutindu nyonso mu kotaka na kanale yina, mpe mu zaba ti Yandi kele awa samu ti mu kele kaka na ngaanda ya munu mosi.” Mu banzaka, “Mu ke sala ti yayi kuvwanda ya nsoni, ya kieleka.”

Mu tubaka, “Ba ke vwanda mpadi ya mbwaki kulumuka na mongo *yina*, kulumuka na lweka *yayi*, mpe kaka pene-pene ya munu, mpe kubasika, mpe kuvwanda na zulu ya divala *yina*, mpe kutala kuna na nsi na fermier *yina*.” Awa yandi me kulumuka na mongo, me basika mbala mosi, mpe me vwanda, me tala fermier. Mpe mu kufwaka yandi na munduki.

150 Satana tubaka na munu, “Nge zaba yinki? Mfinda kele kaka ya kufuluka na bawu, ntangu yayi.” Mpe mu vwandaka kuna tii na ngunga ya kumi na zole, mpe kima yankaka ve kusalamaka. Ya ke lakisa ti ntangu Nzambi. . . Yandi kele Mvangi ya kieleka ya Mazulu mpe ntoto!

151 Na kuwaka, na Jeffersonville ntangu yayi, ya kele na dibuta na nkumbu ya Wright. Mpangi Wood mpe munu kwendaka kuna samu na kutala bawu. Ba ke salaka vinu ya kominyo samu na dibuundu. Ntwenya Edith vwandaka ya kuvwanda kuna na kati ya kivinga; mwa mwana-kento mosi ya kikata, yina vwandaka ya kubela luzingu ya yandi nyonso, mpe na yawu beto vwandaka tala ntangu nyonso na Nzambi na kubelusa yandi. Mpangi ya yandi ya kento, mufwidi ya kento, ba kufwaka bakala ya yandi; ba kufwaka yandi nkumbu ya yandi vwandaka Hattie, mwa kento ya kulemvuka mingi. Mpe na yina Mpangi Banks mpe munu me basika samu na kuzwa kalumbu, bawu lambaka tourte ya nene ya cerise; ba vwandisaka munu mpe kudiaka.

152 Beto nyonso vwandaka ya kuvwanda pene-pene ya mesa, beto vwanda zonzila na yayi, ya salamaka kaka bilumbu fyoti ntete. Mpe na yina mu vwandaka ya kuvwanda pene-pene ya mesa, mu vwandaka zonzila yayi, na mbala mosi mu tubaka, “Yinki zolaka salama?” Mu tubaka, “Mpangi Wright, nge kele kiboba ya bakala, nge ke zombaka bampadi luzingu ya nge nyonso. Mpangi Shelby, nge kele muzombi ya bilanga. Mpangi Wood, mutindu mosi nge kele. Mu me zombaka bawu kubanda bumwana. Beno me monaka ntete mpadi na sycamore mpe divunda ya bansende?”

153 “Ve, tata.”

154 Mu tubaka, “Bawu vwandaka kaka kuna ve.” Mu tubaka, “Kima mosi kaka mu zaba, Ya kele kaka Nzambi mosi yango. Ntangu Abraham vwandaka na nsatu ya dimeme ya bakala, Yandi vwandaka *Yehowa-yile*, Yandi lendaka ‘kubika bima samu na Yandi mosi.’” Mu tubaka, “Mu ke kwikila ti ya kele kima mutindu mosi.”

155 Mpe Hattie ya kiboba yina vwandaka ya kuvwanda kuna na manima, yandi tubaka, “Mpangi Branham, yina kele kima ve kasi Kieleka!”

156 Yandi tubaka kima ya mbote! Ntangu yandi tubaka yawu, Mpeve-Santu kulumukaka diaka na nzila yina, bawu nionso kuwaka Yawu. Mu telamaka, mu tubaka, “Mpangi-kento Hattie, MUTINDU ME TUBA MFUMU, nge tubaka ndinga ya kieleka mutindu kento ya Syrophénicienne tubaka. Mpeve-Santu ke na kuzonzaka na munu ntangu yayi, mpe me tuba na munu na kupesa nge nsatu ya ntima ya nge.” Mu tubaka, “Ntangu yayi, kana mu kele kisadi ya Nzambi, kana ya kele mutindu yina, ya ke salama. Kana mu kele ve kisadi ya Nzambi, kuna mu kele muntu ya luvunu, mpe ya ke salama ve, mu kele muntu ya luvunu.” Mu tubaka, “Ntangu yayi meka mpe mona, kana ya kele Mpeve ya Nzambi to ve.”

157 Yandi tubaka, “Mpangi Branham,” (muntu nyonso vwandaka dila), yandi tubaka, “yinki mu ke lomba?”

158 Mu tubaka, “Nge kele na mpangi-kento mosi ya kikata ya kuvwanda kuna.”

159 Mu vwandaka na ba-dollars makumi zole na posi ya munu, samu na kupesa yandi, ti dikabu yina yandi salaka. Kento yayi ke kuzwaka ve ndandu ya ba-dollars bankama zole na mvula mosi, na mwa ferme ya yandi, ya fioti, ya mputu, samu na yandi mpe bana ya yandi zole ya babakala. Bana ya yandi ya babakala zolaka vwanda ‘ba-Ricky’ ya ntangu nyonso, mutindu bantwenia kele na lukolo, beno zaba, mpe vwandaka luzitu ve na ntwala ya mama ya bawu; mpe bamvula kumi na tanu, kumi na sambanu. Mpe, oh, bawu vwandaka ya kutelama kuna vwandaka seka na yina mu vwandaka tuba.

160 Mpe mu tubaka, “Nge kele na tata mpe mama ya kuvwanda awa yina kele kiboba. Nge kele na mbongo ve. Lomba mbongo, mpe tala kana ya ke kwisa na makulu ya nge. Lomba samu na mpangi ya nge ya kento, mpe mona kana yandi ke telama mpe yandi tambula ve.” Mu zabaka na ntangu yina, mutindu Job, ya kele kaka na kima yina beno zaba ntangu beno ke bula yawu. Yandi tubaka, “Mu zaba! Awa mu me telama na ntwala ya bantu kumi,” mu tubaka, “kana yayi ke salama ve, na yina mu kele profete ya luvunu.”

161 Yandi tubaka, “Yinki mu ke yufula?”

162 Mu tubaka, “Ya me tala nge na kubaka lukanu ya nge. Mu lenda baka lukanu ya nge ve.”

163 Yandi talaka bisika nyonso, mwa kento yango. Mpe na mbala mosi, yandi tubaka, “Mpangi Branham, nsatu ya kulutila nene na kati ya ntima ya munu keke mpulusu ya bana ya munu zole ya babakala.”

164 Mu tubaka, “Mu ke pesa nge bana ya nge ya babakala, na Nkumbu ya Yesu Klisto.” Mpe bana yina vwandaka seka, wandaka seka, vwandaka sala maseki kubwaka na makulu ya mama ya bawu, mpe pesaka luzingu ya bawu na Nzambi, mpe fulukaka na Mpeve-Santu kaka kuna.

165 Samu na yinki? Ya kele Kieleka! Nzambi keke na kiyeka ya kufwa munu, na ntuala ya bantu yayi na yinsi ya muvimba. Mingi ya beno awa mpe na Jeffersonville, mu lenda kuwa tabernacle kubula ntangu yayi, “Amen!” samu ti bawu keke ya kuvwanda kaka kuna ke na kuwa yawu. Beno me mona, samu ti ya kele Kieleka! Yinki ya kele? Ya keke ntangu Nzambi, na nzila ya lemvo ya Yandi ya ngolo; ya ke salama! Na ngaanda ya kuna, ya ke salama ve.

166 Na ntangu yina ya lukanu... Beno banza na bantu mpe bantu yina mu zaba. Nzambi na kubikaka bantu nyonso ya lukumu, mpe nyonso, samu na kupesa mwa kento mosi ya mputu, ya kukikulumusana, na mpasi yandi lendaka ve kusunika nkumbu ya yandi mosi; mpe Yandi zabaka yina yandi ke lombwa. Mpe yina vwandaka kima ya kulutila nene; samu mpangi ya yandi ya kento me kufwa ntangu yayi, mpe mama ya yandi mpe tata ya yandi fwana kufwa, mbongo zolaka kufwa, kasi mioyo ya mwana ya yandi ya bakala keke ya Seko! Mpe yina vwandaka ngunga samu bawu simba Yawu. Mpe kaka na ntangu mu tubaka, “Mu ke pesa nge bana ya nge ya babakala, na Nkumbu ya Yesu Klisto,” kuna bawu kubwaka na makulu ya mama ya bawu. Bantu yikwa na kati awa zaba ti ya kele Kieleka, beno zaba yawu? [Dibuundu me tuba, “Amen.”—Mu.] Beno me mona? Ya kele kieleka. Yinga. Samu na yinki? Lutwadusu ya kimpeve!

167 Ntangu yayi: “Mu me kuwa na Nge, ti Nge lenda vanga bampadi; Mu me kuwa na Nge, ti Nge lenda vanga nkombo ya bakala; kasi ntangu yayi mu me mona Nge, na disu ya munu mosi!” Kumonisama, vision monisamaka pwelele. Ntangu Nzambi silaka kima mosi, yawu yina Yandi ke sala.

168 Beno tala, ntangu beno keke na nsatu, mu banza mutindu Josué. Yandi vwandaka na nsatu; yandi banzaka ata fioti ve na mambu yina, yandi tubaka yawu, mpe ya vwandaka Nzambi! Beno ke kwikila ti mwini telemaka kuna? Mutindu mosi na munu. Wapi mutindu ya salaka yawu? Beno meka ve na kubakula yawu, kasi ya salaka yawu. Josué salaka yawu, mpe yandi telemisaka maboko ya yandi; na ntangu yina ya lukanu yandi vwandaka na muswa na ntuala ya Nzambi, mpe yawu yina

salamaka. Ya vwandaka ntangu ya kulunga. Mpeve ya Nzambi ya Moyo monaka nsatu ya yawu, mpe vwandaka tambula na zulu ya Josué na kutuba yawu. Nzambi mosi yina monaka nsatu ya Abraham. Nzambi mosi yina monaka nsatu ya kusiamisa Masonuku yayi na munu, ti Disonuku *yina* kele kieleka, mpe! Nzambi mosi yina monaka nsatu ya bana ya babakala zole yina ba soolaka na mantwala, mpe ya vwandaka na ntangu yina Yandi siamisaka yawu mpe siamisaka Ndinga ya Yandi.

<sup>169</sup> Santu Marc 14, beto ke mona kento mosi ke kwikila na Yandi, yandi vwandaka na nsatu mpe yandi monaka ti Yandi vwandaka na nsatu ti ba sukula makulu ya Yandi, yandi zolaka vwanda kaka ya kutwadisa na kimpeve na kukota na kisalu. Ntangu yayi beno kuwa mbote mutindu. . . ntete beto sukisa. Yandi zolaka vwanda kaka ya kutwadisa na kimpeve na kukota na kisalu, samu ti yandi kuwaka yimeni na zulu ya Yandi. Yandi kuwaka ti “Yandi lemvo kilaka kento ya masumu ya yandi, kento ya kindumba. Mpe yandi tubaka, ‘Nani ya beno kele kukondwa disumu? Losa ditadi ya ntete.’” Yandi kuwaka Yandi, kasi ntangu yayi yandi monaka Yandi. Yandi vwandaka ya kutwadisa na kimpeve na kusadila Yandi. Ya kele kaka kima yina beno fwana vwanda.

<sup>170</sup> Ti Mpeve-Santu kutuba na beno ti “Nge kele musumuki!” Ti Mpeve-Santu kutuba na beno “Nge kele na foti!” Ti Mpeve-Santu kusiamisa na beno na nzila ya Masonuku ti “Beni kele na nzila ya yimbi landila Masonuku!” Mpe yina. . . samu Ya ke ningisa kaka nzila nyonso mosi ya Masonuku nyonso ya Nzambi, Ya ke luta ve na nzila ya kima mosi. Kana beno sala yawu, Ata mbala mosi ve ti Yawu ke sala beno mbote. Samu ti Mpeve-Santu lenda twadisa Yawu na kimpeve na beno, kasi kana moyo kele ve ya kudedama na Nzambi, mutindu beto me mona yawu na sabala yayi, ya kele mbote ve na mutindu nyonso. Beno bambuka moyo, bapakulami ya luvunu ke telama na bilumbu ya nsuka; ve ba-Yesu ya luvunu, baklisto ya luvunu (bapakulami), mpe ke vuna Basolami kana ya lendaka salama.

<sup>171</sup> Beno tala, yandi vwandaka na kisalu ya kusala samu na Yandi. Yandi kuwaka Yandi, ntangu yayi yandi monaka Yandi na meso ya yandi. Yandi vwandaka na kisalu ya kusala, mpe yandi vwandaka ve na kima ya kusala na yawu. Na yawu yandi kwendaka nswalu na mutindu nyonso, samu na kusala lukutakanu, Nzambi pesaka maza mpe balisume samu na kusukula makulu ya Yandi. Yandi kuwaka na Nzambi ya Moyo, luzingu ya yandi nyonso, kasi ntangu yayi yandi monaka Yandi na meso ya yandi. Yandi zabaka ti ya vwandaka Yandi, mpe lutwadusu ya kimpeve simbaka yandi, mpe tubaka, “*Yayi* kele Munati nsangu!” Yandi vwandaka na nsatu ya kisalu (yandi vwandaka ve na kima ya kusadila Yandi), makulu ya Yandi vwandaka mvindu. Kasi yandi kwendaka nswalu na mutindu nyonso, samu na kusala kisalu na Yandi, samu ti yandi vwandaka



ya kutwadisa na kimpeve na kusala yawu.

<sup>172</sup> O mambele ya dibuundu ya retrograde, bakala ya denomination to kento, beno lenda mona ve nsatu yina Yesu kele na yawu na nkokila yayi? Kana dibanza ya kimpeve lendaka bula beno kaka, yayi kele ngunga ya kusala yawu. Kasi yandi monaka Yandi na meso ya yandi. Bayankaka yina vwandaka kuseka Yandi. Bawu kwikilaka ve na Nsangu ya Yandi. Ya kieleka, nzenza, nzenza-pasteur, Simon ya kiboba, nataka Yandi kuna samu na kusawula Yandi. Bawu kwikilaka ve ti Yandi vwandaka profete.

<sup>173</sup> Na yawu kuna ntangu ya monanaka ti dyabulu salaka yawu kaka na kati ya yandi na kutuba yayi, yandi tubaka na yandi mosi, “Kana bakala yayi vwandaka profete, yandi zolaka zaba wapi mutindu ya kento yina vwandaka na makulu ya yandi. Kana yandi vwandaka profete!” Beno me mona, ya vwandaka ve ya kumonisama na yandi Nani Yandi vwandaka. Ya zolaka vwanza ve na dibanza mosi ya kimpeve ke bula yandi, samu ti ya kele ve na kima kuna yina ke bula yawu. Kasi ba bulaka yawu na yandi!

<sup>174</sup> Meso ya yandi monaka na zulu ya masawula ya yandi. Yandi kwikilaka ti Yandi vwandaka, beno me mona, Ndinga ya baprofete. Yandi zabaka ti Yina vwandaka Bandinga nionso ya baprofete, yina siamisamaka na Yandi. Yandi kuwaka ti Yandi vwandaka na zulu ya ntoto, kasi ntangu yayi yandi ke mona Yandi. Beno tala mbote yina yandi salaka. Yandi monaka Ndinga me kuma nsuni, Mesiya, Emmanuel. Ntangu yandi manisaka kubula ya ntima ya yandi ya lukwikilu (ya luzayikisu ya Nani Yandi vwandaka, na ntangu yina yandi vwandaka zinga, ti Yandi vwandaka Mwana-dimeme ya Nzambi samu na misumuki ya mutindu yina yandi vwandaka), yandi kwendaka samu na kusadila bansatu ya Yandi kukondwa kuzaba wapi mutindu yandi ke sala yawu.

<sup>175</sup> Ya kele mutindu kubeluka ya kieleka ke kwizaka, ntangu ya ke monisama na beno ti “Yandi lwalaka samu na masumu ya beno, ba nyokolaka yandi samu na disumu ya beno ya nko, mpe na bamputa ya Yandi *beno* belukaka.” Ntangu ya me twadisama na kimpeve na beno na kumona Mvwandulu ya Yandi awa, ya Santu Marc 11, to, Santu Luc 17:30, ti Yandi ke kukimonisa Yandi mosi na bilumbu ya nsuka (na kati ya bantu ya Yandi, na nzutu ya muntu) mutindu Yandi salaka na ntwala ya Sodome. Ntangu beno ke mona yawu, mpe kima mosi ke bula beno!

<sup>176</sup> Dokotolo lendaka tuba, “Cancer kele dyaka kuna.”

<sup>177</sup> Mbevo lendaka tuba, “Mu—mu—mu—mu—mu zaba ve wapi mutindu mu ke tambula, kasi mu ke tambula na mutindu nyonso.” Beto zaba ve wapi mutindu ya ke sala.

<sup>178</sup> Yandi kwendaka na ntwala samu na kusadila Yandi, samu lutwadusu ya kimpeve bulaka Yandi...bulaka yandi,

yina vwandaka ngunga, yina vwandaka Munati nsangu, yina vwandaka Mesiya Yina zolaka belusa, mpe yandi kwikilaka Yawu. Mpe Yandi vwandaka na nsatu ya kisalu ya kusala na Yandi, mpe yandi kwendaka na ntwala kukondwa kima mosi samu na kotalisa ti yandi lendaka sala yawu. Yandi mataka kaka na zulu ya lutwadusu ya yandi ya kimpeve. Beno tala mbote! Nzambi pasulaka bayinto ya ba-glande na meso ya yandi. Meso mosi yina kuwaka . . . makutu yina kuwaka Yandi; meso yina monaka Yawu, basisaka maza ya meso ya kyese. Na yina dyaka, bansuki ya yinda yina Nzambi pesaka yandi, mpe masa ya meso yina vwandaka kulumuka. Nzambi pesaka yandi balisume (na bansuki ya yandi), mpe na masa ya meso ya yandi. Yandi sadilaka bansatu ya Yandi, nsatu ya Nzambi ya Moyo. Yandi kuwaka Yawu, kasi ntangu yayi yandi monaka Yandi, yandi zolaka sala kisalu ya Yandi.

<sup>179</sup> O musumuki! Samu na yinki beno ke sala mutindu mosi ve mutindu beno ke mona bansatu ntangu yayi? Ti Yandi ke na nsatu ya beno, kisalu ya beno! Ntangu yayi beno ke mona Yandi, Yina mbala mosi beno kuwaka na Biblia. Beto monaka Yandi mazono na nkokila kwizaka awa, mpe yina Yandi salaka. Beto ke mona Yandi, kukutana na manima ya lukutakanu, mpe bantangu yankaka beto ke vwanda kaka madidi mpe ke kipe ve, beno tuba, “Yinga, mu zaba ti Masonuku ke tuba yawu. Oh, mu—mu me monaka yawu kusalama, beno me mona.” Beto kele ve na kyese mingi, ya ke monana ve ti ya ke bula beto kieleka. Ya ke monana ve na kima mosi, mutindu kana beno vwandaka mwangisa . . .

<sup>180</sup> Kana beno baka zalumeti mpe beno kwanga yawu, kana zalumeti kele ve na sufulu na zulu ya yintu ya zalumeti, ya ke pela ve. Mpe beno lenda kalata mpe kalata mpe kalata, kasi kana kima mosi ya chimie me kufwa sufulu na zulu kuna, ya ke pela ve, ya ke vwanda na nsemo ve. Kasi kana produit chimique yina, sufulu yango ba me kwanga yawu na kisengo . . . kana ya kele kaka kuna ntangu ba ke kwanga yawu, ya ke pela.

<sup>181</sup> Mpe ntangu nsiamisa ya kieleka, ya kieleka ya Masonuku ya Nsangu ya kilumbu yayi ya nsuka, mpe beno ke mona Mvwandulu ya Yesu Klisto, ti beno kuwaka yina Yandi salaka na luzingu ya Yandi, mpe kuwa Masonuku kutuba “Yandi kele mutindu mosi mazono, bubu yayi mpe kukonda nsuka”; mpe kaka na ntwala na mutindu ya Sodome ke yokama na tiya na nganzi ya Nzambi, beno me mona Yesu kuvutuka na kati-kati ya bantu ya Yandi, yina salamaka na nsuni ya muntu, mpe kusala kima mutindu mosi Yandi salaka. Oh! Ya zolaka bula mioyo ya beto na Nkembo! Ya zolaka sala kima mosi samu na beto. Samu na yinki? Ya ke na kubwa na zulu ya yawu.

<sup>182</sup> Beno kuwaka na kati ya Biblia yina Yandi salaka, mutindu kento yina simbaka lele ya Yandi. Yandi balukaka mpe tubaka na yandi yina vwandaka mpasi ya yandi, mpe lukwikilu ya yandi belusaka yandi. Ntangu yayi, Yandi silaka ti Yandi ke sala diaka

kima ya mutindu mosi, kaka na ntwala yinza yokama na tiya, mpe yinza ke vwanda na mutindu ya Sodome. Ngwisani ya Malu-malu, Profete, Nzambi-Profete, Profete ya baprofete, Nzambi ya baprofete nionso, muvimba ya Bunzambi na nzutu, Nzambi ya . . . monisamaka na nzutu, Mvangi, ya Genèse. Alleluia! Ya kele Ndinga ya Yandi! Yandi tubaka ti ya ke salama! Mpe beto ke mona mutindu ya Sodome, beto ke mona yinza na mutindu yina, ntangu yayi beto ke mona Yandi kukulumuka mpe kusala kieleka yina Yandi tubaka ti Yandi ke sala. Ntangu yayi, beto me kuwa Yandi, ntangu yayi beto ke mona Yandi! “Mu me kuwa Nge na makutu ya munu, ntangu yayi mu me mona Nge na meso ya munu.” Amen! “Mu me mona Yandi na meso ya munu mosi.” Wapi ngunga ya zolaka vwanda! Wapi ntangu ya zolaka vwanda! Kusiamisama ya Ndinga ya Yandi! Ntangu nyonso ntangu Ndinga me siamisama, ya kele Nzambi ke na kuzonzaka na kati ya Ndinga ya Yandi, na kumonana Yandi mosi ti beno lenda mona.

<sup>183</sup> Ntangu yayi, ya kele na mwa kento mosi ya kindumba ya ntama na bala-bala, yandi ke kubwa na autel, na ntwala ya Yesu, mpe yandi sukulaka makulu ya Yandi na—na masa ya meso, mpe—mpe me kusuna yawu na bansuki ya yandi. Nzambi zitisaka, Yandi tubaka, “Kisika nionso Nsangu ya mbote yayi me longama, bika ti yayi kutubama samu na lubambuku ya yandi.” Samu na yinki? Beno tala mutindu yandi vwandaka mvindu, kasi kima mosi bulaka. Yandi monaka Ndinga ya nsilulu, kubanda disamba ya Eden, yayi, “Nkuna ya kento ke diata yintu ya nioka.” Yandi monaka Mesiya yina butukaka na mwense.

<sup>184</sup> Yandi kuwaka ti Yandi zolaka butuka na mwense, kasi bawu kuwaka ti Muntu yina vwandaka na zulu ya ntoti. Yandi kuwaka ti ya vwandaka na ntwenya mosi ya Rabbi, Profete, Yina belusaka bambevo. Yandi kwikilaka yawu! Mpe yandi kwisaka kuna na bala-bala, yandi vwandaka tambula, yandi vwandaka tala bisika nionso. Mpe yandi talaka kuna mpe monaka feti yina ya nene vwandaka salama. Yandi kotaka na lupangu, mpe me tala na nzila, mpe kuna Yandi vwandaka. Kuna Yandi vwandaka! Kima tubaka, “Ya kele Yandi!” Beno me mona, yawu yina kaka yandi vwandaka na nsatu ya kuvwanda ya kutwadisa na kimpeve. Beno me mona yina salamaka? Yandi monaka Ndinga ya Nzambi me kuma nsuni. Yandi kuwaka na dikutu ya yandi, ntangu yayi yandi monaka na meso ya yandi.

<sup>185</sup> Ntangu yayi, muntu nyonso zaba ti beto kele na nsilulu ya mutindu ya dibuundu, na kilumbu ya nsuka. Dibundu, na mutindu ya yawu, lendaka ata fioti ve kulungisa misiku ya Nzambi, lutumu ya nene, lendaka ata fioti ve kubokila Kento ya makwela na kubasika. Nani ke sala yawu? Ba-Pentecotiste? Mu fwana tuba ve. Ata mosi ya bayankaka ya bawu. Ya kele mpusu yina kele na zulu ya blé. Yina basikaka, vwandaka talana kaka kieleka mutindu blé, kasi ya vwandaka ve na blé na yawu. Ya

ke zibuka, kasi mbuma ke basika na yawu. Bawu ke bongisa, bawu ke kufwa bawu mosi. Ya kele kisika yina bawu ke kufwa. Ba kele mikengi. Kasi blé me basika kuna, mpe ntangu yayi ya me banda na kusala na mutindu ya Kento ya makwela. Mbuma ya blé yina kubwaka na ntoto na nzila ya bansungi ya mudidi, ya zolaka kufwa.

<sup>186</sup> Muntu yina ke tonga ke tuba, “Samu na yinki Nzambi ya kyadi, lendaka zibula Mubu ya Mbwaki, Yandi bikaka Baklisto yayi ya bamputu bawu kudia bawu na bankosi, mpe ba yoka bawu, mpe nionso? Yandi vwandaka, kaka mutindu Yandi sekaka samu na yawu!” Muntu ya mputu yina me zaba kima ve! Yandi zabaka ve, “Kaka mbuma ya blé kubwa na ntoto”? Ya zolaka kufwa na nzila ya bansungi yango ya mudidi, mutindu mbuma nyonso yankaka ya blé fwana kwenda na yisi ya ntoto mpe ba zika yandi, samu na kubuta na reforme ya ntete matiti zole ya Luther, mwinga. Ya zolaka basika na ba-Wesleyen, kuna, samu na kunata putulu, bafelele, nsungi ya nene ya ba-missionaire. Yandi zolaka kwiza na Pantekote, samu na kuvutula ya makabu, na kutala samu na kuvuna bantu ya kieleka ya Kusolama. Ya ke talana mutindu mbuma ya blé; ke zibula yawu, ya kele ve na blé kuna na nyonso, ya kele kaka mpusu. Kasi kuna na manima, kuna, bawu bandaka na kusala organisation ya ba-unitaire, organisation ya ba-trinitaire, organisation ya Nzambi, mpe dibuundu ya organisation, mpe nyonso ya organisation, mpe kaka lufwa kieleka! Mpe ntangu yayi yinki ke salama? Kasi ya kele kisika ya kubumbama samu na blé, ya me kula na nzila ya yawu ntangu nyonso.

<sup>187</sup> Ntangu yayi ya me banda na kukatula, blé me banda na kumonana. Yayi kele ve nsungi ya Pantekote. Yayi kele nsungi ya kilumbu ya nsuka. Yayi kele nsungi ya Kento ya makwela. Yayi kele Nsemo ya nkokila. Yayi kele ntangu Malachie 4 fwana kusalama, samu na kulanda kifwani ya Nzambi. Yayi kele Luc 17:30, samu na kulungisa. Yayi kele nzila ya zole. . . Mpe Jérémie, mpe bayankaka nyonso ya bawu, yina Joël kuzonzaka na bilumbu yayi, *yayi* kele kilumbu yango yina. “Mu kuwaka, Mfumu, mpe Yawu vwandaka kwiza, kasi ntangu yayi mu ke mona Yawu na disu ya munu.”

<sup>188</sup> Ata ti mingi. . . lutangu ya bantu ya luvunu ya bamekudi ke telama, bawu Jannès na Jambres na mayele ya bawu nionso ke na kusala bima nionso yina Moise salaka, yina ningisaka yandi ata fioti ve to Aaron ata fioti ve. Bawu zabaka kisika. . . mutindu Job, bawu zabaka na Nani lutwadusu ya kimpeve ya bawu katukaka. Bawu zabaka ti Yawu vwandaka **MUTINDU ME TUBA MFUMU!** Mpe Biblia mosi yina zonzilaka na bawu, tubaka, “Bawu ke kwiza na bilumbu ya nsuka, bamekudi.” Ba-denomination yina ya misambidi, ntangu kima mosi bandaka. . . Nani bandaka ntete? Moise to bayankaka? Kana bawu bandaka ntete, Moise zolaka vwanda mumekudi.

189 Ntangu yayi beto kele na mitindu nyonso ya kumona mpe nyonso yankaka yina ke na kumekaka na kulosa dibanza ya beno na kima ya kieleka ya Nzambi, yina Nzambi me talisa ti ya kele Kieleka na nzila ya Masonuku ya Yandi. “Beto me kuwa Yawu na makutu ya beto, ntangu yayi beto ke mona Yawu na disu ya beto.” Amen! Beno ke kwikila Yawu? Bantima ya beto nionso! Lutwadusu ya kimpeve! Mpe na kilumbu yina ntangu Mwana ya muntu ke monisama, Mwana ya muntu, Yesu Klisto me monisama na kati-kati ya bantu ya Yandi.

190 Muntu mosi kwendaka kuna na ntwala ya Abraham mpe kimvuka ya yandi, kaka Muntu ya mutindu nionso, putulu na zulu ya bilele ya Yandi. Yandi vwandaka na mukongo ya Yandi ya kubaluka na tenta, Yandi tubaka, “Wapi kisika kele kento ya nge Sarah?” (S-a-r-a-i ve, S-a-r-a; A-b-r-a-h-a-m, A-b-r-a-m ve). Yandi bokilaka nkumbu ya yandi, yandi tubaka, “Wapi kisika yandi kele?”

191 Yandi tubaka, “Yandi kele na kati ya tenta, na manima ya Nge.”

192 Yandi tubaka, “Mu ke kwisa tala nge landila ntangu ya luzingu” (mpe yandi sekaka na kinsweki ya yandi). Yandi tubaka, “Samu na yinki yandi me seka?” (Uh-huh). Ntangu yayi, Yandi silaka. Bantu yina vwandaka sosa mwana ya nsilulu.

193 Ntangu yayi, mu ke kipe ve wapi mutindu bantu ke salaka na ba-denomination yayi, ti bawu ke “vingila Klisto,” bisalu ya bawu ke lakisa ti bawu kele ve. Ya kele kieleka. Bisalu ya beno ke zonzaka mingi kulutila bandinga ya beno. Nyonso yina bawu ke na kubanzaka kele bamambeke ya denomination, kasi ya kele na bantu yankaka, mosi *awa* mpe *kuna*, yina ke na kuvingila Nkwizulu ya Mfumu. Ba ke na kuvingila . . . ata mutindu yina. Kaka bayina Yandi ke kukimonisa Yandi mosi na bawu, kaka bayina ke bakula.

194 Kaka Musolami bakulaka Nani Yandi vwandaka. Beno banza kaka, ya kele na kutala mafuku tatu ya bantu, ba-Juif, na zulu ya ntoto, ya vwandaka ve na mosi na zulu ya tatu ya bawu yina zabaka ti Yandi vwandaka kuna tii Yandi zolaka kwiza mpe kufwa. Beno me mona? Kasi Yandi monisamaka Yandi mosi na bayina vwandaka vingila: Jean Mubotiki, mpe—mpe bantumwa yina ba bokilaka na Jean, mpe nyonso yina, mpe Anne na tempelo, Siméon nganga-Nzambi ti “ya vwandaka ya me monisama na yandi na nzila ya Mpeve-Santu ti yandi zolaka mona Klisto.” Bantwadisi yayi nionso ya nene ya misambidi, ba-théologien mpe nionso yina, mpofu mutindu bawu lendaka vwanda!

195 Kaka mvula lenda vumbula nkuna, kana nkuna kele yimeni kuna. Mpe mutindu beno vwandaka nkuna ntete na tata ya beno, mpe yandi zabaka beno ve, kasi beno vwandaka na kati ya tata ya beno. Kasi na nzila ya kutiamuka ya mama ya beno,

beno me monisama na kifwani ya yandi, mpe na manima yandi lendaka tuba na beno. Nzambi, Nzambi ya Nene; kana beno kele na Luzingu ya Kukonda nsuka, na yina nkuna ya Luzingu ya Kukonda nsuka vwandaka na kati ya Nzambi na mbandukulu. Mpe beno vwandaka kuna, beno vwandaka na mabanza ya Yandi, nkumbu ya beno mpe nionso yina. Mpe Yandi, na luzabu ya mantwala, tumaka beno na kumona Yayi. Mpe beno bayina ba tumaka ve, ke mona Yawu ata fioti ve. Kasi, beno bambuka moyo, na Nkumbu ya Mfumu Yesu, “Ngunga yawu yayi!” Beno ke kwikila Yandi ve? Beno pesa baluzingu ya beno na Yandi. Mu fwana sukisa, ya kele na manima ya ngunga ya yivwa.

Beto kulumusa bayintu ya beto.

<sup>196</sup> “Mu me kuwa, Mfumu, ya Nge, ntangu yayi mu me mona Nge!” Mfumu Yesu, sakumuna bantu yayi na yina bawu ke na kuvingila.

<sup>197</sup> Ntangu yayi mu ke yufula beno kiuvu mosi. Mu ke bika Mpeve-Santu (Mu ke na kivuvu ti Yandi ke sala yawu) beno longuka mabanza ya beno, beno meka, beno meka moyo ya beno, mpe beno tala kana beno ke kwikila kieleka. Mpe kana beno tala ti ya kele na mwa ntembe kuna, beno zola kutelemisa diboko ya beno? Beno tuba, “Mfumu Yesu, bika mu mona Nge. Mu me kuwaka na Nge, kasi mu me monaka Nge ntete ve. Bika mu mona Nge, mu ke kwikila.” Mbote mingi. Ya kele mbote.

<sup>198</sup> Ya kele na bayankaka awa yina zaba Yandi ve mutindu Mvulusi ya beno? Beno telemisa diboko ya beno, beno tuba, “Kana . . . Mu—mu kele musumuki, kasi kana mu . . . kana Nge—kana Nge ke bika kaka munu kumona Nge, Mfumu Yesu, ke talisa Ndinga yayi yina bawu ke na kutuba. Mu zaba ti ya kele mutindu Job monaka Nge. Mu zaba ti ya kele mutindu Abraham monaka Nge. Mu zaba ti ya kele mutindu bayankaka nionso monaka Nge, samu ya vwandaka Ndinga ya Nge ya nsilulu yina me siamisama. Mu me kuwaka mitindu nyonso ya bima, mpe maye ya yimbi, mpe nyonso, kasi mu me bakula ti ya kele na Nsangu ya kilumbu ya nsuka na yinsi, yina ba zonzaka na Wanzio na kumu ya nzadi, na 1933. Mu kuwaka balukutakanu ya kubeluka ya nzutu kukwenda na ntwala, mpe mu zaba ntangu ya ke salama, ya lenda vwanda ve na dibulu yina mosi ya denomination.” Ba fidisaka yawu ve samu na yawu, ba vwandaka ata fioti ve kuna. [Kisika ya mpamba na bande—Mu.] . . . ? . . .

<sup>199</sup> Yinki zolaka salama kana Moise zolaka kwisa, yandi tubaka, “Beto tunga nzaza mutindu Noé salaka, kuna na zulu ya nzadi ya Egypte”? Oh, ve. Beno me mona? Ve! Yandi vwandaka na Nsangu ya Nzambi, yandi vwandaka kumonisama. Profete yina ke na kubasika na kisalu, zolaka talisa kaka na Israel kuna. Bawu vwandaka ve na profete bamvula nkama yiya, bawu vwandaka

ve na profete, mpe profete mosi ke basika na kosalu. Ba zolaka zaba ti kima mosi zolaka salama.

<sup>200</sup> Israel vwandaka diaka ve na profete kubanda bankama ya bamvula, mpe Yesu kotaka na kosalu. Mpe kento yina na dibulu ya masa, tubaka, “Tata, mu ke mona ti Nge kele profete. Ntangu yayi, beto me kuzwa mosi ve bamvula nkama yiya.” Samu, Yandi zabaka yina vwandaka na kati ya ntima ya yandi. Beno me mona?

<sup>201</sup> Ntangu yayi, ba silaka beto nsungi ya dibuundu na nsungi ya basungiki, mpe beto me kuzwa yawu. Kasi Yandi silaka, na Malachie 4, Yandi ke vwanda ya kukwikama na kifwanukusu ya Yandi na bilumbu ya nsuka, yina ke salama, “Kuvutula bantima ya bana na Lukwikilu ya tata ya bantumwa.” Samu na lukanu yina! Mpe dibuundu me panzana mingi na ba-denomination mpe ba-isme, ya me panzana mingi na bitini-bitini tii ya me kufwa; ya me vwanda munati. Mpe kuna Yandi silaka, na ngunga ya Nsangu ya wanzio ya sambwadi, Bidimbu Sambwadi ke monisama; mpe ba ke zabisa mansweki ya Nzambi (Apocalypse 10) ntangu wanzio ya sambwadi ke banda na kubula Nsangu ya yandi, ve kosalu ya kubeluka ya nzutu, Nsangu yina ke landaka kosalu ya kubeluka ya nzutu.

<sup>202</sup> Yesu vwandaka “muntu ya nene” ntangu nyonso yina Yandi zolaka belusa bambevo. Kasi Yandi tubaka ntangu, “Munu mpe Tata ya Munu kele Mosi.”

<sup>203</sup> “Huh-uh! Ya vwandaka luvunu!”

<sup>204</sup> Job vwandaka “nene,” tii kima mosi salamaka na yandi. Beno me mona? Ya kele ntangu nyonso mutindu yina.

<sup>205</sup> Kwikila! Nge ke ndima Yandi ntangu yayi? Telemisa diboko ya nge, tuba, “Mu ke kwikila Yandi. Mu zola ndima Yandi.” Nzambi sakumuna nge. Nzambi sakumuna nge. Ya kele mbote.

Ntangu yayi beno vwanda swi mpe beno sambila kaka mwa ntangu fyoti.

<sup>206</sup> Nzambi ya luzolo, na ntangu yayi ya mfunu, ya ke vwanda ntangu mutindu yayi ntangu kieleka ya ke vwanda na makelele ya nzasi kilumbu mosi, mpe Mwana ya Nzambi ke kulumuka na mazulu na kuboka, na ndinga ya Archange, mpe mpungi ya Nzambi, bantu ya kufwa na Klisto ke vumbuka na lufwa. Mpe mosi na mosi ya beto zaba mpe kele ya kuzaba na nokila yayi, Tata, ti beto ke pesa mvutu samu na konso ndinga yina beto ke pesa, mpe konso ndinga yina beto ke tuba. Ata mpe mabanza yina kele na kati ya bantima ya beto, beto ke pesa mvutu samu na yawu. Mu ke sambila Nge, Nzambi, na Nkumbu ya Yesu, ti Nge ke sukula konso ntima yina kele na kati awa. Vedisa ntima ya munu, sukula bantima ya bantu yayi. Mpe ti beto vwanda ya kuyilama, Mfumu, mpe ti meso ya beto ya kimpeve kuzibuka na nokila yayi samu na kumona Nkembo ya Nzambi ya Ngolo nyonso. Beto me kuwa Yandi, O Tata Nzambi, beto ke

sambila ti Nge ke bika beto kumona Yandi. Pesa yawu, Tata. Pesa balusakumunu yayi, mu ke sambila, na Nkumbu ya Yesu Klisto. Amen.

207 Beno bambuka moyo: Na kati ya ntima ya beno, kisika beno kele ya kuvwanda, beno sala mwa autel ya beno. Beno tuba, “Mfumumu Yesu, kwisa na kati ya ntima ya munu ntangu yayi. Pesa munu kima mosi na . . . kima mosi mu lenda kanga ntima. Bika mu kuwa lutwadusu ya kimpeve yina ke tuba na munu ti Nge kele ‘awa.’”

208 Ntangu yayi, wapi mutindu ya nsamunu ya kusala na bantu! Wapi kima ya kusala! Ntangu yayi mu ke lomba Mfumumu Nzambi, beno lomba . . .

209 Bantu yikwa na kati ya beno ke baka ba-bande? Beno kuwaka: *Wapi Ntangu Yayi, Batata?* Beto lakisaka bamagazine yango mpe nyonso, mvula mosi ntete yawu kusalama? Science kele na zulu ya yawu. Ya vwandaka na Mfumumu Yesu yina ba me lwatisa mpe na perruque yina ya mpembe mutindu beno ke mona na Biblia, na Apocalypse 1, mpe Daniel, Zuzi ya nene ya Mazulu mpe ntoto. Kaka kuna, ntangu science lenda kwandi ve kumona Yawu bawu mosi. Mpe na laboratoire, kuna na Yinza ya muvimba ya Arizona mpe kuna na Mexique, ba ke na kusosaka, ba ke salaka yawu kubanda bamvula zole. Mpe kuna ba tubaka na beno, ti ya ke “salama,” na ntwala.

210 Wapi mutindu samu na yina me tala kuningana ya ntoto ya Alaska? Beno tala mbote kubwa ya Hollywood! Beno tala mbote mpe beno tala kana ya ke mutindu yina ve. Ata mbala mosi ve ti Yandi me tubaka na munu kima ya yimbi, ya ke sala yawu. Beno me mona? Mpe beno tala kaka mbote mpe beno mona kana beto ke na kuzinga ve na bangunga ya nsuka ya disolo. Muntu ve zaba yinki ngunga Yandi ke na kwiza. Kasi mu zaba kima mosi: mu banza, na nkadulu ya munu ya ntangu yayi, kana mu kele na mabanza ya munu ya mbote, mpe kana mu vwandaka ve Muklisto, Mu ke zola kuvwanda Muklisto ya kieleka ya Biblia, ya denomination ve. Beno tala ve samu ti beno me bokaka. Beto kuwaka yawu na suka yayi, me siamisa yawu na nzila ya Ndinga ya Nzambi; ya kele nyonso na nganda ya luzolo ya Nzambi, salaka dyambu ve kasi kunata lufwa. Beno vwanda ve na mwinga, beno vwanda na Luzingu. Beno me mona? Beno vwanda na lukwikilu na Nzambi.

211 Beno ke kwikila ti Nzambi yina salaka nsilulu yayi, yina monikaka Yandi mosi, na Buku ya Genèse, mpe monikaka na Abraham mpe salaka kimangu yina . . . Nzambi mosi yango kumaka nsuni, nsuni ya muntu, yina butamaka na mwense. Ya vwandaka théophanie kuna, kieleka, kasi na yina ntangu Yandi kwisaka na nzutu ya muntu mpe vwandaka Muntu mosi, mpe vwandaka lungisa bima ya mutindu mosi, . . . Beno kwikila yawu ve kana Nzambi lendaka kuzwa muntu, ti Yandi silaka na kusala



landila Malachie 4, nzila yina Yandi lendaka zonza, Yandi ke sala kima mutindu mosi Yandi tubaka ti Yandi ke sala kuna? Beno ke kwikila yawu? Mu ke kwikila ti Yandi ke sala yawu, mpe.

212 Beno ke kwikila ti beno lendaka vwanda na lukwikilu samu na kusimba lele ya Yandi, lukwikilu ya Yandi samu na kusimba lele yina? Beno ke kwikila ntangu yayi ti kima mosi ke na kutuba na ntima ya beno yina ke tuba na beno ti beno kele na lukwikilu ya kusimba lele ya Yandi? Beno ke kwikila ti beno lenda sala yawu? Beno ke telama mpe ke simba lukwikilu ya beno na ntangu yina, ve na émotion, kaka na lukwikilu ya kuvedila, ya kukondwa mvindu. Beno tuba kaka, “Mfumu, mu ke kwikila. Mu ke kwikila na ntima ya munu ya muvimba. Mu zola ti Nge simba munu samu ti mu—mu me kuwa Nge kusala yawu, ntangu yayi mu zola kumona yawu na meso ya munu mosi.”

213 Mpe mu lenda ve kusimba beno. Ya ke lomba Nzambi na kusala kusimba. Beno ke kwikila ti Yandi ke sala yawu?

214 Mu ke na kotalaka kaka na diboko ya munu ya kento awa. Ya ke monana ti ya kele na nzila, mutindu, mutindu mu me tuba, na kubakaka nzila yina. Na yina mu me zonzila yawu mutindu yina, ntangu yayi ya me kuma mbote. Ya kele mama ya kuvwanda kuna na bakala ya yandi. Yandi kele awa ve. Yandi me katuka na Texas, na Dallas. Yandi ke na kimbevo, mpe bakala ya yandi ke na kubelaka. Yandi ke na kotalaka mpasi ya bankwamusu mingi, yandi me kuzwa lipaso. Ya kele kieleka. Bakala ya yandi kele na mpasi na mukongo ya yandi, mpasi ya mukongo. Tata mpe Mama Corbet, na Texas; na Dallas, na Texas. Kana ya kele mutindu yina, telemisa diboko ya nge. Mu kele nzenza samu na nge. Ya kele kieleka? Ya kele ve mutindu na yinza samu na munu na kuzaba yawu. Yinki ya kele? “Mu me kuwa Nge na dikutu, ntangu yayi mu ke mona Nge.” Beno me mona yina mu zola kutuba? Ntangu yayi beno lomba bankwelani yina. Mu me monaka yawu ntete ve na luzingu ya munu. “Mu me kuwa Nge na dikutu, ntangu yayi mu ke mona Nge na disu ya munu.”

215 Kana beno lendaka kwikila, Nzambi lendaka pesa yina beno ke na yawu nsatu.

216 Bakala yina me telama kuna na diboko ya yandi na zulu ya kibefo, na hypertension yina. Nge ke kwikila ti Nzambi ke belusa nge, tata? Nge ke kwikila yawu? Ya kuvwanda na diboko ya nge mutindu *yayi*, nge ke kwikila ti Nzambi ke belusa nge na hypertension yina? Telemisa diboko ya nge, kana nge ke kwikila Yawu. Mbote mingi, Yandi ke sala yawu. Mu me monaka ntete ve muntu yayi na luzingu ya munu, mu zaba kima mosi ve samu na yandi. Kasi beno kuwaka ti Yesu tubaka, awa na kati ya Biblia, ti Yandi ke sala bima yayi, ntangu yayi beno ke mona yawu! Beno me mona yina mu zola kutuba? “Kana nge lenda kwikila, nyonso ke salama.” Kaka samu na bayina ke kwikila! Ya

ke lomba lukwikilu ya kieleka, ya kisina na kusala yawu. Kasi kana beno lenda kwikila Yawu, Nzambi ke pesa yawu.

217 Kele na mama mosi ya kuvwanda kuna na manima, ke tala munu, yandi kele na goitre na laka ya yandi.

218 Mama ya kuvwanda pene-pene, ya kuvwanda pene-pene ya yandi, ti yandi ke bakula, mama yina kele na hypertension, mpe. Ya kieleka.

219 Mama yina me vwanda pene-pene ya yandi, yandi kele na mpasi, mpe. Mpe yandi kele ya awa ve, yandi kele ya Arkansas. Ba ke na kukondwaka yawu. Mademoiselle Philips, kwikila na Mfumu Yesu Klisto mpe nge ke beluka! Beno ke kwikila Yandi? Na ntima ya beno ya muvimba? Beno ke ndima Yawu? Kieleka. Na yina beno lenda kuzwa yawu.

Ntangu yayi beno ke tuba, “Yina kele mansweki.” Ve! Ve!

220 Yesu tubaka, “Nkumbu ya nge kele Simon, nge kele mwana ya Jonas.” Ya kieleka?

221 “Mu me kuwa Nge na dikutu ya munu, ntangu yayi mu me mona Nge na disu ya munu.” Ntangu yayi beno ke mona ve yina salamaka? Muntu mosi me vwanda kaka kuna, ke tala, ke kwikila, ke sala kivuvu, mpe na mbala mosi yawu ke salama. Beno me mona?

222 Nge ke kuwa mbote, mwana, na nkokila yayi, kulutila mutindu nge vwandaka mazono na nkokila? Ya kuvwanda? Ya kele mbote mingi ntangu yayi, nge ke beluka (uh-huh). Ya kuvwanda awa mazono na nkokila, kasi vwandaka benda yintu ya yandi mpe nyonso yankaka yina; ntangu yayi, na nkokila yayi, yandi ke talana mutindu muntu ya mbote. Beno me mona? Yandi vwandaka mwa fyoti na poto-poto samu na bima, kasi ya kele nyonso ya kusungama ntangu yayi. Beno me mona? Ya ke vwanda mbote mingi. Beno me mona? “Mpe na kilumbu yina, Mwana ya muntu ke monisama, beno me mona, kaka na ntwala Sodome kuzika na tiya.”

223 “Mu me kuwa Nge na dikutu ya munu, ntangu yayi mu ke mona Nge na disu ya munu. Mu kuwaka Yesu Klisto kutuba ti Yandi silaka yawu, mu ke mona nsilulu yina kele moyo ntangu yayi.” Beno me mona? “Mu me kuwa Nge na dikutu ya munu, ntangu yayi mu me mona Yandi na disu ya munu.” Bantu yikwa ke kwikila ti Yandi kele Yandi? (O Nzambi!)

224 Ntangu yayi, na yina beto kele awa . . . ntangu me luta. Mbasi na nkokila beto ke kuzwa lukutakanu ya nene ya kubeluka ya nzutu. Beto ke vingila Mpangi Moore mpe munu yina ke telama awa mpe ke sambila samu na muntu nyonso yina zola kukwiza na nzila. Kasi mu banzaka na kuzonza yayi na nkokila yayi, mu zolaka sala kaka mbokolo na autel. Kasi kuna mu banzaka, “ve,” Ya tubaka kuna, “Mu me kuwa Nge na dikutu, ntangu yayi mu

zola kumona Nge na disu ya munu.” Ntangu yayi Yandi kele awa. Beno ke kwikila yawu?

<sup>225</sup> Ntangu yayi beto tentika maboko ya beto na zulu ya mosi na yankaka. Ntangu yayi, beno bambuka moyo, Yandi yina mosi silaka ti Yandi ke sala *yayi*, yandi tubaka, “Bidimbu yayi ke landa bayina ke kwikila.” Yandi tubaka Yawu? Beno kele mukwikidi? Beno tuba, “Amen.” Mbote, na yina, Nzambi mosi yina salaka nsilulu yayi yina beno ke mona Yandi kusala kaka ntangu yayi, . . . Beno yufula bantu yina nionso, mu me monaka bawu ata fioti ve, mu zaba kima mosi ve samu na bawu. Mu ke zaba bawu ve ntangu yayi, beno me mona, ya lenda salama ve samu na munu. Kasi Masonuku yina fwana kulungisama! Mbote, kana yina me salama, ya ke talisa ti beto kele na bantangu ya nsuka, beto ke zaba ti Mwana ya muntu me kubama na kuvwanda . . . na kukwisa, samu Yandi ke monisama Yandi mosi na nzutu ya muntu. Ya kieleka?

<sup>226</sup> Na yina beto zaba ti ya kele kieleka, mpe beno ke tuba ti beno kele mukwikidi na zulu ya Yandi, mpe beno me tentika maboko ya beno na zulu ya mosi na yankaka. Mpe kana maboko ya beno kele ya kutula na zulu ya mosi na yankaka, Mwana ya Nzambi mosi yina kele awa samu na kukumisa *yayi* kieleka na meso ya beno, Mwana mosi kele awa samu na kutuba, “Bawu ke beluka!” Mwana ya Nzambi mosi! “Mu kuwaka ti Yandi tubaka, ‘Kana mikwikidi tentika maboko ya bawu na zulu ya bawu, bawu ke beluka.’ Mu kuwaka yawu na makutu ya munu, ntangu yayi bika mu mona yawu na meso ya munu. Yandi silaka na kusala yawu.”

Ntangu yayi na yina mu ke sambila, beno sambila.

<sup>227</sup> Mfumu Yesu, na Nkumbu ya Mfumu Nzambi ya Mazulu, bika ti Mpeve ya Nge kukota na kati ya ntima ya bantu yayi; lukwikilu ya kieleka ya Nzambi, yina ke siamisa nsilulu yayi na bawu. Mpe bika ti Nzambi ya Mazulu kubelula bawu nionso, mutindu ba ke tumama na misiku ya Nge na kutulaka maboko na zulu ya mosi na yankaka. Bika ya vwanda mutindu yina, Mfumu. Na Nkumbu ya Yesu Klisto, pesa ti ya ke vwanda mutindu yina, samu na nkembo ya Nge.

<sup>228</sup> Ntangu yayi, beno ke kwikila ti beno kele na yina beno me lomba? Kima mosi na kati ya ntima ya beno ke tuba na beno? Beno ke kuwa mwa kima yango ya dibanza ya kimpeve, kutuba, “Kasi, ya me suka! Ya me suka!”?

<sup>229</sup> Musiku ya Nzambi tubaka ti beto lenda kuwa yawu na dikutu ya beto, ntangu yayi beto lenda mona yawu na disu ya beto. Job tubaka, “Mu me kuwa Nge na nzila ya kuwa dikutu, kasi ntangu yayi mu me mona Nge na meso ya munu.”

<sup>230</sup> Ntangu yayi, beno kuwaka yawu na nzila ya Ndinga, na nzila ya kuwa Ndinga, “Lukwikilu ke kwizaka na nzila ya kuwa, kuwa Ndinga.” Ntangu yayi beno ke mona Yawu kusala, na meso ya beno! Ntangu yayi, Nzambi mosi yango yina tubaka

ti, ntangu bima yayi zolaka salama, ti “mikwikidi na Yayi ke tentika maboko ya bawu na zulu ya bambevo mpe bawu ke beluka.” Ntangu yayi ya me kubwa na kati ya ntima ya beno ti beno me “beluka”? Beno telemisa maboko ya beno kana ya me salama. Amen! Ya kele kubeluka ya kieleka ya bantumwa. Beno zola kutuba yawu? Beno ke kwikila Yawu na ntima ya beno nyonso? Alleluia! Ya kele nyonso yina beto kele na yawu nsatu.

Beto telama mpe beto pesa Yandi lukumu, na yina.

<sup>231</sup> Matondo na Nge, Mfumu Yesu. Lusakumunu na Nkumbu ya Mfumu.

Mu ke kumisa Yandi, mu ke kumisa Yandi,  
Beno kumisa Mwana-dimeme yina kufwaka  
samu na misumuki;  
Beno pesa Yandi nkembo beno nyonso bantu,  
Samu Menga ya Yandi me sukula matono  
nionso.

<sup>232</sup> Ntangu yayi, beno zola Yandi? Ntangu yayi beto, beto nionso kintwadi, beno pesa Yandi nkembo, beno nionso. Ntangu yayi, beno tala, kana ya me monisama na beno na nzila ya Nzambi, na nzila yina beno kuzwaka mpulusu, nzila mosi yina tubaka na beno “beno kuzwaka mpulusu,” nzila mosi yina Nzambi vwandaka tambula, mutindu Yandi salaka na nzila ya Job mpe bapofete, Yandi me luta na nzila ya beno na nzila ya nzila yina mutindu Muklisto, na nzila ya luzayikisu ya Yandi ya Kinzambi ti “nge me beluka,” na yina ya kele ve na kima ke kanga yawu na kusalama.

Na yawu beto ke pesa Yandi nkembo beno  
nyonso bantu,  
Samu ti Menga ya Yandi me sukula konso . . .  
(Ntembe nyonso; me sukula ntembe nyonso.)

Mu ke kumisa Yandi, mu ke kumisa Yandi,  
Beno kumisa Mwana-dimeme yina kufwaka  
samu na misumuki;  
Beno pesa Yandi nkembo beno nyonso bantu,  
Samu Menga ya Yandi me sukula matono  
nionso.

<sup>233</sup> Oh, beno zola Yandi ve? Ah, mutindu ya kele mbote. “Mu me kuwa Nge, Mfumu, na dikutu ya munu, mpe lukwikilu ke kwizaka na nzila ya kuwa; kasi ntangu yayi mu ke mona Nge, Nzambi ke kukitalisa Yandi mosi na kati ya bantu ya Yandi mutindu Yandi salaka na Abraham, na nzila ya nsilulu ya Yandi awa ti Mwana ya muntu ke monisama Yandi mosi na bilumbu yina yinza ke kuma na mutindu ya Sodome.”

<sup>234</sup> Mpe ya vwandaka na minati-nsangu tatu yina basikaka, kulumukaka na Mazulu.

<sup>235</sup> Mpe ya vwandaka na kimvuka mosi ya denomination kuna na Sodome, mpe Billy Graham mpe Oral Roberts kwendaka kuna. Mpe beno bambuka moyo mutindu mu tubaka na beno, kisika mosi ve na disolo ya dibuundu ya me vwandaka na munati-nsangu mosi yina ba me fidisaka na dibuundu ya nene, tii na ntangu yayi, na nkumbu ya yandi ke suka mutindu Abraham, h-a-m. G-r-a-h-a-m, bisono sambanu, samu na yinza, bantalu ya muntu.

<sup>236</sup> Kasi Abraham vwandaka na bisono sambwadi na kati ya nkumbu, ya muvimba ya Nzambi mpe bantalu ya kulunga. Beno me mona?

<sup>237</sup> Mpe beno tala yina minati-nsangu salaka yina basikaka kuna: longaka Ndinga, bokilaka bawu na kubasika, tubaka na bawu na kubalula ntima.

<sup>238</sup> Kasi Yandi Yina bikanaka na Abraham, beno me mona, salaka kimangu na kutubaka na Abraham yina Sarah vwandaka sala mpe vwandaka banza na tenta na manima ya Yandi. Mpe Yesu, Yina vwandaka Yandi yina vwandaka na kati ya Muntu yayi, yandi tubaka, “Ntangu yinza ke kota na mutindu ya Sodome, mutindu ya vwandaka kuna, Mwana ya muntu ke monisama dyaka.” Mpe Masonuku nyonso yankaka vwandaka siamisa ti ya vwandaka mutindu yina. “Na mbandukulu vwandaka” [Dibuundu me tuba, “Ndinga,”—Mu.] “mpe Ndinga vwandaka na” [“Nzambi,”] “mpe Ndinga vwandaka” [“Nzambi.”] “Mpe Ndinga kumaka nsuni mpe zingaka na kati-kati ya beto.” Ya kele kieleka? Ntangu yayi beto ke mona Ndinga mosi yina ya nsilulu, ya Luc, ya Malachie, bansilulu nyonso yankaka yayi ya bubu yayi, me kuma nsuni, na kuzingaka na kati-kati ya beto, ti beto kuwaka na makutu ya beto; ntangu yayi beto ke mona Yandi (na meso ya beto) kutendula Ndinga ya Yandi Mosi, beto ke na nsatu ya ntendulu ya muntu ve. O Dibuundu ya Nzambi ya moyo, awa mpe na zulu ya allo-allo, beno vumbuka na nswalu nionso, na ntwala ntangu kuluta mingi! Nzambi sakumuna beno.

Mu zola Yandi, mu zola Yandi  
Samu Yandi zolaka munu ntete  
Mpe futaka mpulusu ya munu  
Na yinti ya Calvaire.

<sup>239</sup> Beno lenda banza, dibuundu, ti beno ke na kutala na meso ya beno mosi. . . Ndinga ya Nzambi ya moyo me monisama, nsilulu ya ngunga, na bilumbu ya nsuka, na kutalaka na meso ya beno mosi na Ndinga ya moyo yina ba me tendula na mutindu ya kimuntu, Nzambi na kati-kati ya beto! “Mu ke mona Yandi na meso ya munu mosi, Yandi. . . Mu kuwaka ti Yandi ke sala yawu.” Bantu ya ndwenga nionso ya ntama vwandaka sosa kilumbu yayi, ntangu yayi beto ke mona Yawu me monisama na disu ya beto mosi. Bantu yikwa ya ntama yina ke bokaka ba-Methodiste,


ba-Baptiste, mpe ba-Pentecotiste ya kieleka, ya kisina na nsungi ya bawu, bawu vwandaka sosa kumona yayi kusalama! Mingi ya bawu zabaka ti ya ke salama. Kasi beto me telama na nkokila yayi samu na kumona yawu kusalama! Oh! Beno zola Yandi ve?

<sup>240</sup> Ntangu yayi, Yesu tubaka, “Yayi bantu nionso ke zaba ti beno kele bilandi ya Munu, ntangu beno ke zolana mosi na yankaka.” Na yawu mutindu beto zola Yandi, beto pesana mbote mosi na yankaka mpe kuyimba *Mu Ke Kumisa Yandi, Mu Ke Kumisa Yandi*, Mbote mingi.

Mu ke kumisa Yandi, mu ke kumisa Yandi,  
Oh beno kumisa Mwana-dimeme yina  
kufwaka samu na misumuki;  
Pesa Yandi nkembo nyonso. . . (Wapi mutindu  
beno ke salaka?). . . bantu,  
Samu Menga ya Yandi me sukula matono  
nionso.

<sup>241</sup> Yinki ntinu ya kento ya Beltsashar tubaka na ntwala ya ntinu ya yandi na nkokila yina? “Ya kele na muntu na kimfumu ya nge yina ke Zimbisaka bantembe.” Mpe Mpeve-Santu, na nkokila yayi, ya kele muntu yina ke zimbisaka bantembe! Beno ke kwikila yawu? (Yinki yandi zola? Oh, ya kele mbote mingi.) Muntu yina ke Zimbisaka bantembe! Ntangu yayi, Menga ya Klisto ke katula matono nionso, mvindu ya ntembe. Ya kele ve na disumu ya kulutula nene na yinza kulutula kukondwa lukwikilu, “Samu ti yandi yina ke kwikila ve, kele yimeni ya kufundisa!” Ya kele kieleka? “Yandi yina ke kwikila ve kele ya kubedisa.” Ya kele kaka na disumu mosi, mpe ya kele kukondwa lukwikilu. Kunwa makaya kele ve disumu, kunwana kele ve disumu, kusala pité kele ve disumu, kuvuna kele ve disumu; yina kele disumu ve, yina kele bandandu ya kukondwa lukwikilu. Kukondwa lukwikilu! Beno ke salaka yawu samu ti beno ke kwikilaka ve. Kana beno ke kwikila Yawu, beno ke sala yawu ve.

<sup>242</sup> Oh! Oh! Yinki. . . Mbote mingi! Mpe Menga ya Mwana-dimeme me sukula bantembe nionso. Beto ke kwikila Ndinga ya Yandi, na mutindu nionso. Beto ke kwikila ti Ndinga kitukaka muntu. Mpe beto ke kwikila ti Ndinga *me* kuma nsuni na nzila ya nsiamisa ya Mvwandulu ya Yandi ntangu yayi samu na kusiamisa Ndinga ya Yandi. Beno ke kwikila Yawu? Nzambi sakumuna beno.

<sup>243</sup> Beto ke na kivuvu ya kumona beno awa na suka, samu na ntangu ya nene na Mfumu. Beno kulumusa bayintu ya beno ntangu yayi, mpe mu ke pesa kosalu na Mpangi Lindsay. 

*MU KUWAKA KASI NTANGU YAYI MU ME MONA* KNG65-1127E

(I Have Heard But Now I See)

Nsangu yayi ya Mpangi William Marrion Branham, kulongamaka na Kingelesi, na Kilumbu ya sambanu na nokila, na kilumbu ya 27 ya Ngonda ya kumi na mosi, na mvula 1965, na Life Tabernacle na Shreveport, Louisiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo-Kituba basisamaka na buku mpe ba kabulaka yawu na Voice Of God Recordings.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)